

Jon

Od Anĩ Tamo Wõ Yen

¹ Gariya bun Od anĩ ibodon, Od anĩ Negur ado dibodon, Od anĩ Negur.

² Gariya bun ĩ Negur ado dibodon.

³ ĩ bunem ereb ereb ganan inon, Od anĩ sã bun ereb inodin taka to ibodok.

⁴ Mata ĩ bun ibodon, mata anĩ tamo neid fula fiya.

⁵ Fula fiya anĩ gugum bun lalan ifenek, anĩ ere, gugum ĩ fula fiya anĩ to kelein.

⁶ Tamo taka Negurem sur fe di, isin, ĩ yana Jon.

⁷ ĩ fula fiya anĩ yaor fe, kurõ fesiyouf nigin isin, are tamo kayau ganan ĩ bunem momoi douf nigin age fen.

⁸ ĩ anĩ fula fiya sã, ĩ fula fiya anĩ kurõ fesiyouf nigin isin.

⁹ Fula fiya bagai yogo tamo kayau ganan lalan ifenẽdif, ĩ tenebur isin.

¹⁰ ĩ teneub bun ibodon, are ĩ bunem teneub inon, anĩ ere, tamo kayau tenebur ein, ĩ to kelein.

¹¹ ĩ yogon bagai anidi bun isin, anĩ ere, yogon bagai anidi ĩ to daleyen.

¹² Anĩ ere, idi ĩ daleyen, ĩ yana nigin momoi den anidi bun, Negur idi Negur nẽ gere tar wowã douf nigin igirnẽdin.

¹³ Sina tama nẽ naud bunem to Negur gere tar wowã den, bouwa nẽ oroya bunem sã, tamo nẽ

wau irōya buneg sā, anī ere, Negur yogo age fe di, wowā den.

¹⁴ Od anī tamo wō ye fen, ada atun ibodon. Ada yogen fula fiya medeīya tailen, fula fiya medeīya are Naal Tekelei Yogo Dogol nē, ī Tama bun tamal wau ifenēya ado momoi barikā isin.

¹⁵ Jon ī nigin kurō falaisi wogō yen. ī iweig fen, iron, “İ enei nigin aya arokenein, ‘Taka ī aya dumeun isif, ī aya wal fiyaya, ere nigin, ī ket ibodon.’ ”

¹⁶ In wau ifenēya barikā bunem, ada adok el fiya tale fen, anī teten el fiya musei talen.

¹⁷ Are Moses bunem lo anī talen, anī ere, wau ifenēya ado momoi anī, Jesus Kristus bunem isin.

¹⁸ Taka nem Negur to bagai ilen, anī ere, Negur Naal Tekelei Yogo Dogol, ī Tama wagen ibod ken, ī nigin yaor fen.

*Jon Naan Igunēdiya Tamo ī Yogo Nigin, Aya Kristus Sā, Yen
(Matyu 3:1-12; Mak 1:1-8; Luk 3:1-18)*

¹⁹ Juda tamo Jerusalem temeleid idim, pris tunī, Lewi nē ibor geid sur difedi di, Jon ī aim yeya anī to difiyē di, Jon ī eig ye kurō fesin.

²⁰ ī wa fiya sā, kurō falaisi, “Aya Kristus sā,” yen.

²¹ Idi ī to difiyen, “Age fiyauf are, õ ai? Ô Eliya de?”

İ iron, “Aya ī sā.”

Idi diron, “Ô Profet amā tari mafef anim de?”

İ iron, “Sā.”

22 Age ye di, idi diron, “Õ ai bagai? Õ amã urokanamã len, idi amã sur difaman anidi gein ke ma malauf. Õ ogo nigin ere wof?”

23 Jon profet Asaia nẽ od bun solof iron, “Aya anĩ, ait taka gerere tuan iweig irok, ‘Odug nẽ naab madur gouf.’ ”*

24 Farisia tamo tunĩ sur difedin anidim

25 to difiyen, “Õ Kristus sãf, Eliya sãf, Profet anĩ sãf are, ere nigin naan agunëdif?”

26 Jon aitedin yale iron, “Aya naan nem naan agunëdif, anĩ ere, ã atun, taka ã keleĩ sã anĩ ifaref.

27 Ì anĩ aya dumeun dõ fiyaf, aya to biya nigin, in ye su nẽ malũ biru fediya kisi feleya sã.”

28 Enei ganan Betani oun Jordan naan sitakã, Jon naan igunëdin nẽ an wõ yen.

Jesus, Negur Nẽ Sipsip Naal

29 Naa taka di, Jon, Jesus wagen iyok isi mog, ile fen, iron, “Ulegef, Negur nẽ Sipsip Naal, ì tamo ganan neid mosor yaledif!

30 Enei nigin au fen, oron, ‘Taka ì aya dumeun isif, ì aya wal fiyaya, ere nigin, ì ket ibodon.’

31 Aya Yug ì keleĩ san, anĩ ere, aya asi, naan nem naan agunëdif nẽ gariya are, Israel tamo kayau bun ì yaor souf nigin.”

32 Age ye fen, Jon enei kurõ feis iron, “Aya, Awa Uur saa ilun tamal kuburir gen isi, ì bun ibod mog, ailen.

33 Aya ì to kelein, anĩ ere, taka ì, aya naan nem naan agunëdiyouf nigin sur fiyan im irokanan,

* **1:23:** Asaia 40:3

‘Tamo anĩ, Awa Uur isi, ĩ bun ibod mog, ulouf, im Awa Uur Fateul nem naan igunēdiyouf.’

³⁴ Aya ailen nigin kurō afeis, ‘Eĩ Negur Naal,’ auf.”

Jesus In Dõ Fiya Tar Uyulil Iweignēdin

³⁵ Naa taka di, Jon, in dõ fiya tar uru geid, baban an difaren.

³⁶ ĩ, Jesus isi ile di, ile fen, ĩ iron, “Ulegef, Negur nẽ Sipsip Naal!”

³⁷ Sain Jon nẽ dõ fiya tar uru enei karĩ de fen, idi Jesus dõ difiyen.

³⁸ Jesus falei yel, idi ĩ dõ difiyē mog, ile fen, to fedin, “Ã ere oroyeik?”

Idi diron, “Rabi (anĩ nẽ gariya, Tise), õ nain ubodõdig?”

³⁹ ĩ iron, “Umag fen, ulogouf.”

Age ye di, idi dile, ĩ ibodõdig anĩ dile fen, naa anĩ bun, ĩ geid dibodon. Are aragau fo kilok age fiya.

⁴⁰ Endru, Simon Pita ne tura ĩ, idi uruwom ereb Jon wogõ yen anĩ karĩ de fen, Jesus dõ difiyen anĩ taka.

⁴¹ Ereb uruwa Endru age fen are, ĩ tura Simon imir ile fen, irokenen, “Amã Mesia (anĩ Kristus) fotou mafen.”

⁴² Age ye fen, Endru, Pita Jesus wagen irou ile di,

Jesus Pita lo fiye ken, iron, “Õ Simon, Jon naal. Õ yanã Sifas douf” (Sifas falei fiyauf are, Pita).

Jesus Filip Nataniel Ado Iweignēdin

⁴³ Naa taka di, Jesus Galili ileya nigin kisif fen, Jesus Filip fotou fiye ken, irokenen, “Aya dō wiya.”

⁴⁴ Filip ī, Endru Pita ado geid, Betsaida taun temeleid.

⁴⁵ Filip Nataniel fotou fiye ken, ī irokenen, “Amā ī nigin Moses nē Lo bun itoton ado profet idig ditoton, Jesus Nasaret tamal, Josef naal anī, fotou mafen.”

⁴⁶ Nataniel to fen, “Nasaret! Ereb biya taka, anenem wōyā nigin kisi feleya de?”

Filip iron, “Usi ule.”

⁴⁷ Sain Jesus Nataniel non iyok isi mog, ile fen, ī nigin iron, “Eī Israel tamo bagai, ī bun ereb idegēyā taka sā.”

⁴⁸ Nataniel Jesus to fiyen, “Naig wo fen, ō aya keleī?”

Jesus aiten yale iron, “Aya ō Filip iweignōyā sā mog, aa fig farumen ubod mog, ailiyon.”

⁴⁹ Age ye di, Nataniel Jesus irokenen, “Rabi, ō Negur Naal, ō Israel neid King.”

⁵⁰ Jesus iron, “Aya ō aa fig farumen ailiyon aul nigin, ō momoi wof. Ō anī wal fiya ereb ereb odug ulouf.”

⁵¹ ī tobol fe iron, “Aya ā momoi bagai arokeneik, ā, saa bobog kā fele di, Negur nē engel Tamo Naal bun diselef disif dife mog, ulogouf.”

2

Jesus Irō Di, Naan Wain Falei Felen

¹ Naa uru bure fele di, naa towo bun, tamo kayau ado bagu fiya, Galili distrik oun Kana fonō wō yen. Jesus sinag an ibodon.

² Jesus in dō fiya tar geid idig, tamo kayau ado bagu fiya bun diweignēdin.

³ Sain wain sa kele di, sinam Jesus irokenen, “Idi wain taka sā.”

⁴ Jesus iron, “Kayau, õ ere nigin aya kababal wiyaf? Neu sain fau isiya sā.”

⁵ Jesus sina, kabī tamo irokenēdin, “Ereb ī irokeneif anī dōg, ago gouf.”

⁶ Nodin meein gulub sigis naan ifotūya nē difaren, are Juda neid tobonuneid bun imeid kulo fiya nigin, idi teke tekelei 100 lita age fiya naan iroudig.

⁷ Jesus kabī tamo irokenēdin, “Gulub bun naan utinēdig.” Age ye di, idi ditineid eweid gere fesedin.

⁸ Age difele di, Jesus idi irokenēdin, “Gama tunī lolob ge fen, sifa marau uroule kenēg.”

Age ye di, idi age difen.

⁹ Sifa marau naan wain falei fen anī yō ilen. ī wain anī nainenem be isin anī to kelein, anī ere, kabī tamo naan lolob difen idi kelein. Agef fen, sifa marau ī, kayau marau yerin iweignē, ile di,

¹⁰ irokenen, “Ganan idi wain biya anī ket dirousi di, tamo disif idi anī fatuk dō mog, to biya gen anī dum dirousidig, anī ere, õ biya bagai urou ubodom anī, gama bagai urousif.”

¹¹ Jesus memelik gariya inon are enei bun, oun Galili distrik Kana fonō. Anī bun, ī yogon fula fiya medeīya yaor fe di, yogon dō fiya tar dogo neid momoiya ī bun dinon.

12 Enei bure fele di, Jesus ī, sina, tura tar ado, yogen dō diya tar geid, Kapenaum disilen. An naa musei to dibodon.

13 Juda neid Pasa naa sain melsā mog, Jesus Jerusalem iselen.

14 Tempel modoū bun, tamo, bulmakau, sipsip ado, kuburir na sur difeid fen, tunīg tebol bun dibod ken, moni solo de mog, iledin.

15 Anī ile fen, ī malū nem wip inon, agef fen, tempel modoū bun tamal, sipsip ado bulmakau ganan irudi di, serē dilelen, ī moni solo fiya tamo neid koin moni daūf firagagaū fe fen, ī dogo neid tebol yale, falei feledin.

16 Idi kuburir na sur difen anī irokenēdin, “Eneidi ein waleledig, neu Dei nē fō anī maket modoū to unog!”

17 Dum in dō fiya tar, eig ye itotoya anī nigin wedereid fokō yen, “Ogon fō nigin wau itenēyā anim nameun isainaf.”*

18 Age ye di, Juda tamo Jesus dirokenen, “Ere memelik anī ufelnamā di, enei ganan agof anī nigin õ igirīyā ado mauf?”

19 Jesus idi irokenēdin, “Tempel enei narī weleg len, naa towo bun baban alesauf.”

20 Juda tamo diron, “Tempel enei dinon are, foti-sigis yar yalen, anī õ naa towo bun walesauf de?”

21 Anī ere, tempel ī wogō yen are, yogo bouwa nigin.

22 Ī laa bunem kel fā yen anī bure fele di, in dō fiya tar, ī iron anī, wedereid fokō yen. Anī bunem,

* **2:17:** Sam 69:9

idi Negur nē Itotoya ado Jesus wogō yen anī nigin momoi den.

²³ Gama ī Jerusalem oun sain Pasa Sifa bun ibod ken, tamo kayau musei memelik inodin anī dilen, anī bun ī yana nigin momoi den.

²⁴ Anī ere, Jesus ī yogo bagai, idi nigin to momoi yen, ere nigin, ī tamo ganan nigin keleī.

²⁵ Jesus ī, tamo takam taka nigin ī irokenēya anī kisi feleya san, ere nigin, ereb tamo name bun ibodok, ī yogo keleī.

3

Jesus Nikodemus Ifelen

¹ Farisia tamo taka, yana Nikodemus ibodon, ī Juda uyu irouya neid kaunsel taka.

² Ī bō Jesus wagen isi fen, iron, “Rabi, amā keleī, ō tise Negur bunem usin. Ere nigin, taka nem Negur ī ado to ibodōf are, memelik ō unodif anī inodiya kisi feleya sā.”

³ Jesus aiten yale iron, “Aya ō momoi bagai arokonok, taka nem Negur nē tano to ilouf, ī baban mata gō fiyēf dogol.”

⁴ Nikodemus Jesus to fiyen, “Tamo ī biyan anī, sina naig fe baban gō fouf? Momoi bagai, ī sina namen baban ile di, gō fiyēya kisi feleya sā!”

⁵ Jesus solof iron, “Aya ō momoi bagai arokonok, taka ī, naan ado Awa Uurem mata to wō youf are, ī Negur nē tano bun ileya kisi feleya sā.

⁶ Bouwam gō fef are, bouwa nē, anī ere, Awa Uurem gō fef are, uur nē.

⁷ Ō neu od eig au wogō auf bun, kisi to gurū wouf, ‘Ã de baban mata wō gouf.’

⁸ Yau in oroya bun isi iledig. Ō ait dogol karī wodig, anī ere, õ nainenem isif be, nain be ilef, to keleī youf. Ganan idi Awa Uurem gogū fedif are, age fiya bagai.”

⁹ Nikodemus Jesus to fiyen, “Are naig fe, agef wō youf?”

¹⁰ Jesus iron, “Ō Israel neid tise, anī ere, õ enei to keleik de?

¹¹ Aya õ momoi bagai arokonok, ereb amā keleī anī wogō mauf, age ma fen, ereb amā mailen anī kurō mafesif, anī ere, tamo kayau ā fau amā nemā od to walegef.

¹² Aya ā ereb tenebur tamal nē anī wogō ayeik, anī ere, ā to momoi gef, saa ilun tamal nē anī wogō ayeifeg, naig ge momoi gouf?

¹³ Aibem taka saa ilun to iselen, Tamo Naal saa ilunem isin yogo dogol.

¹⁴ Moses gerere tuan gogour yalesen, age fiya bagai, Tamo Naaleg age de dalesnēf.

¹⁵ Are ganan idi ī nigin momoi def, mata faimud ibodkeleya adouf nigin.

¹⁶ “Negur, tamo kayau teneub enei bun ganan nigin fatuk wau laa fen nigin, yogon Naal tekelei bagai anī ifenēdin, are taka ī, ī nigin momoi youf are, to fō yalauf, mata faimud ibodkeleya adouf nigin age fen.

¹⁷ Negur ī, yogon Naal teneub enei bun, tamo kayau es fediya nigin to sur fen, ī bunem tamo kayau teneub enei bun, kel gei fouf nigin sur fen.

¹⁸ Taka, ī nigin momoi yef are, to es fiyek, anī ere, taka, ī nigin momoīya sā are, ī mogo es fiya bun ifaref, ere nigin, ī Negur Naal tekelei bagai yana nigin to momoi yen.

¹⁹ Foi fiya eig fiya, fula fiya teneub enei bun mogo isin, anī ere, tamo idi dogo neid tobonuneid sane nigin, fula fiya ditor ken, gugum nigin waud laa fen.

²⁰ Tamo idi sane age difef are, lalan to orodidig, ere nigin, dogo neid tobonuneid sane anī yaoreya kumī de fen, lalan namen to disiyouf.

²¹ Anī ere, aib taka ī momoi bun age fef, lalan namen isidig, age fe di, ereb ī age fen are, Negur bunem age fen anī, yaor dilouf.”

Jon Naan Igunēdiya Tamo, Jesus Nigin Kurō Fesin

²² Anī bure fele di, Jesus in dō fiya tar geid, Judia teneub bun dilen, an ī idi geid sain naal dibod ken, naan igunēdin.

²³ Joneg Ainon Salim non naan igunēdin, ere nigin, an naan musei bagai, anī nigin, tamo kayau naan igunēdiyouf nigin toku disidig.

²⁴ (Are Jon fau kalabus bun to dinenē mog.)

²⁵ Jon nē dō fiya tar tunī, Juda tamo taka geid, dogo neid tobonuneid dō de fen, imeid kulo difedig anī nigin luwa diroun.

²⁶ Idi Jon wagen disi dirokenen, “Rabi, tamo ū uruwom Jordan naan sitakā ufareg fen, ī nigin kurō weis uron, ī naan igunēdif, age fe di, ganan ī bun dilef.”

²⁷ Jon solof iron, “Tamo ī, ereb saa ilun tamal ifenek anī dogol yalouf.

28 Ñ aug aya oron anī sā kurō walaisi gef, ‘Aya Kristus sā, anī ere, aya ī ket sur fiyan.’

29 Mois kayau are, mois tamo nē. Mois nē mou ī, bagu fiya bun ifar fen, karī fiyek, ī mois tamo nē ait anī karī ye fen, kulīya odug ado. Kulīya are neu, anī gama kisi felef.

30 Ī yana odug isele di, aya yanau tenebur isilauf.

31 “Taka ī ilunem isif, ī ganan wal fiya, taka ī tenebur tamal are, tenebur nē, anī nigin, tenebur nē anī wogō yedig. Taka ī saa ilunem isif, ī ganan wal fiya.

32 Ereb ī ilen ado karī yen anī, kurō falaisif, anī ere, yogon od taka nem to yalef.

33 Taka ī yogon od yalen anim, Negur ī momoi bagai ye fen, anī megeir ifenen.

34 Taka ī Negurem sur fiyen are, ī Negur nē od wogō yef, ere nigin, Negur ī Awa Uur idikeleya sā ifenek.

35 Tama ī Naal nigin wau laaf fen, ereb ereb ganan ī ima bun inon.

36 Aib ī Naal nigin momoi yef are, mata gai ibodkeleya ado, taka ī Naal nigin itorok are, ī mata to ilouf, Negur nē didi ī bun ibodok.”

4

Jesus Samaria Kayau Ado Wogō Den

1 Jesus Jon wal fiye ken, in dō fiya tar musei geif naan igunēdif ya anī, Farisia tamo karī den.

2 Anī ere, momoi bagai Jesusem naan igunēdiya sā, are in dō fiya tar anidim.

³ Sain Odug enei kelei ken, ī Judia distrik itor ken, baban Galili kel ilen.

⁴ Gama ī Samaria atu ilauf.

⁵ Anī nigin, ī Sikar taun oun Samaria, Jakop, ne naal Josef teneub kulu ifenen non, iyok isin.

⁶ An Jakop nē naan ifotokon tutuwō ibodon, Jesus naab meluk iyok isi, tuwa yu kele di, naan ifotokon tutuwō sirin ibodon. Are mogo gaa atun age fiya.

⁷ Agef mog, Samaria kayau taka naan ifotūya nigin isi di, Jesus kayau irokenen, “Aya naan tau wana di, ãf.”

⁸ (In dō fiya tar, taun saaf na yaleya nigin dilelen.)

⁹ Samaria kayau Jesus irokenen, “Õ Juda tamo di, aya Samaria kayau. Naig fe di, ayam ō naan afon, wāf nigin to wiyaf?” (Juda tamo kayau idi, Samaria tamo kayau geid to uyu katō difedig.)

¹⁰ Jesus kayau irokenen, “Õ safina ege luwa Negur ifonok ado, aibem naan nigin to yok anī keleim are, ō ī to wiye di, mata ifenēya nē naan anī ifonom.”

¹¹ Kayau iron, “Odug, ō ifotūya nē safina sā, naan ī ilon bagai. Ő mata ifenēya nē naan are nain walouf?

¹² Tamamā Jakop naan ifotok kanama ken, ī yogog gere tar ado gaareg anī bun don, ō ī wal fiya de?”

¹³ Jesus kayau aiten yale iron, “Ganan naan enei doko, idi baban naan ail fediyouf.

¹⁴ Anī ere, taka ī aya naan anī afenē di, yoko, ī baban to bagai naan ail fouf. Naan aya ī afenek,

warur naan ī namen faimud ulo ulō yef yenē di, anim mata gai ibodkalauf.”

¹⁵ Kayau Jesus irokenen, “Odug, naan enei wanauf, ago di, aya baban naan ail to fiya fen, naan enei bun ifotūya nigin toku ein to kelauf.”

¹⁶ Ī kayau irokenen, “Ule, ogon tamо uroken ken, kel usig.”

¹⁷ Kayau iron, “Aya tamо sā.”

Jesus kayau irokenen, “Ō tamо sā wof are, ō tutuk urok.

¹⁸ Ere nigin, ō mogo tamо faif adon, tamо gama ō ado are, ogon aiwā sā. Ō ogo urom, are momoi bagai.”

¹⁹ Kayau iron, “Odug, aya ō ailiyok, ō profet taka.

²⁰ Amā tamamā tar, arei enei bun Negur yana dalesedig, anī ere, Juda ā urōgedig, Negur yana yaleseya modoū areoun Jerusalem dogol.”

²¹ Jesus kayau irokenen, “Kayau, aya momoi wiya, sain fau isi di, baban arei enei bun ado, Jerusalemeg an, Dei yana to walesagauf.

²² Samaria ā, ereb ā keleī sā anī yana walesegedig, amā ereb amā keleī anī yana malesedig, ere nigin, tamо kayau kel yaleya nē are, Juda ibor bun tamal.

²³ Sain isiyouf are, gama mogo yeir isol, Negur momoi bagai yana dalesedig are, uur ado momoi bunem Dei yana dalesauf, ere nigin, idi age fediya anī Dei ī imirnēdif.

²⁴ Negur ī uur, anī nigin, ī yana dalesedig idi, uur ado momoi bunem, yana dalesauf.”

²⁵ Kayau iron, “Aya keleĩ, Mesia (Kristus dedig) fau isif. Í isiyouf sain bun, ereb ereb ganan faded famãf.”

²⁶ Age ye di, Jesus kayau irokenen, “Aya inim yeir od ayok.”

Jesus Nē Dō Fiya Tar Keku De Disi, Jesus Geiden

²⁷ Agef mog bagai, in dō fiya tar keku de disi, Jesus kayau anĩ ado od de mog, dileid fen, terẽ den. Anĩ ere, taka nem to, to fiyen, “Õ ere oroyok?” be “Õ ere nigin ï ado od gef?”

²⁸ Kayau, ne naan gulub itor yen, taun kel ile, tamo kayau irokenëdin,

²⁹ “Umag, tamo taka, aya ereb ereb ganan age afef asin irokanal anĩ uleg. Í anĩ Kristus be.”

³⁰ Idi taun ditor disi, Jesus garan dilen.

³¹ Age de mog, in dō fiya tar Jesus totol bagai dirokenen, “Rabi, ereb taka wõ.”

³² Anĩ ere, ï idi irokenëdin, “Aya saaf ã keleĩ sã anĩ ãf nigin ado.”

³³ Age ye di, in dō fiya tar abob dirokenen, “Taka nem mogo saaf irousí ifenem de?”

³⁴ Jesus iron, “Neu saaf are, aya sur fiyan in oroya dō afe fen, in kabĩ bure afalauf anĩ.

³⁵ Æ eig ge to urõgedig de, ‘Ogõ fo bure fele di, kusu fiya sain wõ youf? Aya ã arokeneik, meleĩ fara weleg fen, kabĩ onoudi ulogouf! Idi mogo kusu fiya nẽ mayo bure felen.

³⁶ Kusu fiya tamo ï gama mala solo yalef, ï gama mata faimud ibodkeleya nẽ biya kususufef, anĩ bun, itenëya tamo ado kusu fiya tamo waud al fouf.

37 Anī nigin, od enei momoi bagai, ‘Tamo takam itenēdig, tamo takam kusu fedig.’

38 Aya, ã kabī to walegen nē an, kusu fiya nigin sur ayein. Tunim kabī totol dalen, anī ã idi neid maab mala anī kusu gen.”

Samaria Tamo Kayau Musei Momoi Den

39 Samaria tamo kayau, taun anī bun temeleid musei, ī nigin momoi den, ere nigin, kayau anī eig ye kurō fesin, “Ī ereb ereb ganan age afef asin anī irokanal.”

40 Anī nigin, Samaria tamo kayau ī gein disi, ī idi geid dibodōf nigin totol bagai dirokenē di, ī naa uru, idi geid dibodon.

41 In od bunem, musei fau fau momoi den.

42 Idi kayau anī dirokenen, “Amā ogon od bun dogol to momoi mauf, ere nigin, amā mug karī mau fen, amā keleī, tamo enei momoi bagai teneub ganan enei nē Isennēya.”

Jesus, King Nē Kabī Mudur Naal El Fiyen

43 Naa uru bure fele di, Jesus Galili ilen.

44 Jesus ī yogo iron, ‘Profet taka, yogon fō gariyan, ī yana sā.’

45 Sain ī Galili wō yen, Galili tamo kayau ī daleyen. Idi Jerusalem Pasa Sifa bun, ī ereb ereb age fen ganan dilen, ere nigin, idig an weim difaren.

46 Ī baban Galili distrik oun Kana fonō ki fen, kulu an ī naan wain falei felen. Sain anī bun, king nē kabī mudur taka nē naal Kapenaum taun an dagi yenен.

47 Tamo enei, Jesus Judia distrik tamal Galili isin anī karī ye fen, ī Jesus gein ile, ne naal laa melsā yenen anī, isi el fiyēf nigin igonen.

48 Jesus ī irokenen, “Ā memelik uris ado anī to ulogouf are, ā to bagai momoi gouf.”

49 King nē kabī mudur iron, “Odug, neu kesu fau laa fiya sā mog, õ usiyouf.”

50 Jesus ī irokenen, “Ō wadā ule. Ō naal fau mata ibodōf.”

Tamo anī, Jesus nē od momoi ye fen, ilen.

51 Ī fau naab iyok ile mog, yogon ferfer ī fotou difiye ken, yogon kesu mata ibodok anī wogō difiyen.

52 Age de di, ī gaa mala ganī bun, ne naal dagi karikan anī to fiyēdin. Idi ī dirokenen, “Bouwa uruwa, nor wan kilok aragau folō fiye kelen.”

53 Age de di, tama ī kelein, sain anī bun bagai, Jesus irokenen, “Ō naal fau mata ibodōf.” Anī nigin, ī yogo, ne fō tura tar ganan geid, momoi den.

54 Jesus Judia distrik bun tamalem Galili isi fen, memelik inon, are eneim anī uru.

5

Jesus Dagi Tamo Betesta Naan Kolili Fiyan El Fiyen

1 Dum, Jesus Juda neid sifa bun Jerusalem iselen.

2 Jerusalem an Sipsip Bobog non, naan kolili fiya tako Hibru od nem Betesta dedig ibodok, naan kolili fiya anī sirin meein torem fō faif dinodin dibodok.

³ An dagi tamo kayau musei denenādig, meleid ifofakeleya, yeid kirorōya, bouweid ilolaisidin.*

⁵ Difaren nē an, tamo taka dagi ado ibodok ile, teti-eit yar yalen.

⁶ Sain Jesus ī an yen mog, ile fen, ī sain meluk dagi ado an yenen anī kelei ken, ī to fiyen, “Ó biya leya oroyok de?”

⁷ Dagi tamo iron, “Odug, sain naan moyō fe di, taka nem isenna di, naanū isileyta to ibodok. Aya asilauf au mog, taka ketem uyu wal fiya fen, isiledig.”

⁸ Age ye di, Jesus ī irokenen, “Fā wo! Ogon gogoū wenēdig anī wale fen, uyok ule.”

⁹ Age ye di, tamo kaisā bagai dagi sa kele di, ī yagon gogoū yale fen, iyok ilen.

Anī wō yen naa are, Sabat naa.

¹⁰ Anī nigin, Juda tamo idi, tamo dagi sa kelen anī dirokenen, “Naa eī Sabat naa.† Ó ogon gogoū irouya nigin lo katū yef.”

¹¹ Anī ere, ī aitedin yale iron, “Tamo ī el fiyal anim, ‘Ogon gogoū wenēdig anī wale fen, uyok ule,’ fiyal.”

¹² Anī nigin, idi ī to difiyen, “Tamo enei nanim, ‘Ogon gogoū wale fen, uyok ule,’ yom?”

¹³ Tamō el fiyen, ī aib ya anī nene yelen, ere nigin, Jesus ī an guru difen anī namen iwaikelen.

* ^{5:3:} Itotoya tunī eig de ditoton: *ilolaisidin. Idi naan moyō fouf nigin tari difedig.* ⁴ *Sain taka taka Odug nē engel taka isi, naan moyō fedig. Taka ī moyō mugu mugu ile fen, ī ket naanū isilef, ī ereb dagi ado are el feledig.* † ^{5:10:} *Sabat naa anī, Juda neid uub nē naa.*

¹⁴ Dum Jesus tamo anī tempel bun fotou fiye ken, irokenen, “Ulef, õ baban biya lel. Baban mosor to uno, are ereb sane bagai uruwa nē wal fiya anī, õ bun to wō youf nigin.”

¹⁵ Tamo are ile, Juda tamo irokenēdin, ‘Aya el fiyal tamo are Jesus,’ yen.

Negur Naal Bunem Mata Ibodōya

¹⁶ Jesus Sabat naa bun enei age fedig nigin, Juda tamo idi ī morō difenen.

¹⁷ Jesus idi irokenēdin, “Neu Dei ī faimud kabī yalef isi, gama naa enei buneq kabī yalef, anī nigin, ayag kabī alef.”

¹⁸ Jesus age yen nigin, Juda tamo idi ī dukesiyyouf nigin kabī totol dalen, Sabat naa nē lo wal fiya bun nigin dogol sā, ī Negur nigineg neu Dei ye fen, aya Negur ado tekelei yen nigin.

¹⁹ Anī nigin, Jesus od enei idi irokenēdin, “Aya ā momoi bagai arokeneik, Naal ī yogon oroyam ereb taka to age fouf, ī Tama agefef anī dogol ile fen, īg age fedig, ere nigin, ereb Tama agefef are Naaleg age fouf.

²⁰ Tama ī Naal nigin wau laaf fen, ī ereb ereb age fedig anī ganan ifelnek. ī ereb ereb enei wal fiya Naal ifelnēf, anī bun ā terē gouf.

²¹ Tama ī laa turī feid fen, mata ifenēdidig, age fiya bagai, Naal īg aib ī orof anī mata ifenēdig.

²² Tama ī aib taka to es fiyēf, anī ere, ī es fiya kabī ganan Naal bun inon,

²³ are tamo kayau ganan idi Temeid yana dalesedig gen, Naal nigineg yana dalesauf nigin ī age fen. Taka ī Naal yana to yalesef, ī Tamam Naal sur fiyen anī yana to yalesef.

24 “Aya ã momoi bagai arokeneik, taka ĩ neu od karĩ ye fen, aya sur fiyan ĩ nigin momoi yef, ĩ mata faimud ibodkeleya ado fen, es fiya bun to ilauf. ĩ laa bun tamal ibal fen, mata bun ilen.

25 Aya ã momoi bagai arokeneik, sain fau isif, are mogo yeir isil, laa tamo Negur Naal nẽ ait karĩ douf, idi karĩ def anidi mata dibodõf.

26 Tama ĩ yogo bun mata ado, age fiya bagai, ĩ mata de anĩ Naaleg adouf nigin ifenen.

27 Agef fen, Tama ĩ Naal es fediyouf nigin megeir ifenen, ere nigin, ĩ Tamo Naal.

28 “Eig fiya bun to terẽ gouf, sain fau isif, ganan nedî matmat bun dibodok idi, ygon ait karĩ de fen,

29 ulolõ desiyouf, idi biya age difen anidi mata dibodõf niginfafã douf, idi sane age difen anidi es fedî di, hel bun dilauf niginfafã douf.

30 Aya neu oroyam, ereb taka to naig be afouf. Aya karĩ auf kilei bagai, aya es afef, neu es fiya are madur bagai, ere nigin, aya yug nigin au fen, to age afedig, anĩ ere, aya sur fiyan ĩ wau al fouf nigin au fen, age afedig.

Jesus Yogo Nigin Kurõ Fesin

31 “Aya yug nigin aya mugu wogõ auf are, neu wogõya are, momoi be sã be anĩ yaor sã.

32 Taka ĩ aya nigin kurõ fesidig, agef fen, aya keleĩ, ĩ aya nigin kurõ fesif are momoi.

33 “Ã Jon garan tamo tunĩ sur wedige di, ĩ aya nigin momoi od anĩ kurõ falaisi irokenëdin.

34 Aya tamom aya nigin kurõ fesif anĩ to arroudig, anĩ ere, aya ã isenneñf au fen, od anĩ wogõ aun.

35 Jon ī lam futur fen, lalan ifenen, age fe di, ã sain tobega bagai waleg fen, in lalan nigin wauī al fen.

36 “Neu kurō fesiya anī Jon nē wal fiya, ere nigin, kabī aya bure afalauf nigin Dei ifanan alef anim, Dei ī aya sur fiyan anī kurō fesif.

37 Dei ī sur fiyan ī yogo, aya nigin kurō fesin. Ñ ī ait to karī gen, nog to ulegen,

38 in odeg ã bun to ibodok, ere nigin, ã sur fiyen anī ī nigin to momoi gedig.

39 Ñ Negur nē Itotoya keleī youf nigin kabī totol walegedig, ere nigin, ã kisi gef, anī bunem amā mata faimud ibodkeleya malef ge fen, ago gedig. Negur nē Itotoya enei, aya nigin kurō fesif.

40 Anī ere, ã mata yaleya nigin, aya wageun isiya utorōgedig.

41 “Aya tamom yanau dalesauf nigin to orok,

42 anī ere, aya ã nigin keleī. Aya keleī, ã wauī bun Negur nigin wauī laa fiya to ibodok.

43 Aya neu Dei yana bunem asin, anī ã aya to waleyagen, anī ere, aibem takā yogo yana bunem isif are, ã walogouf.

44 Ñ abob yana yaleseya anī oroyei ken, yana yaleseya Negur Tekelei bunem isif anī to totol unog walogouf are, ã naig ge momoi gouf?

45 “Anī ere, ã ayam Dei mala bun ãgenei sane anī kurō afesiyouf ge fen to kisig. Ñ genei sane kurō fesiya are Moses, ī bun ãgenei wauī iseya unogedig anī.

46 Ñ Moses nigin momoi gem are, aya nigin eg momoi gem, ere nigin, im aya nigin itoton.

47 Anī ere, ereb ī itoton anī to momoi gef nigin, naig ge fen, aya wogō auf enei nigineg momoi gouf?”

6

*Jesus Faif Tausen Tamo Saaf Ifenēdin
(Matyu 14:13-21; Mak 6:30-44; Luk 9:10-17)*

1 Enei dumen, Jesus Galili Maaī ub sitakā ibal ilen (Galili Maaī anī, yana taka Taiberias Maaī).

2 Age fe di, tamo kayau musei ī dō difiyen, ere nigin, ī dagi tamo kayau bun memelik ino di, meledim dilen.

3 Agef fen, Jesus arein isel, yagon dō fiya tar geid dibodon.

4 Juda neid sifa inoya Pasa naa melsā mog.

5 Sain Jesus mala irakel, tamo kayau musei ī garan disi mog, ileid fen, ī Filip irokenen, “Ada tamo kayau eneidi dāf nigin, bret nain na talouf?”

6 ī Filip kisi fiye ken, enei to fen, ere nigin, Jesus ī ereb age fouf nigin are ī keleī.

7 Filip Jesus aiten yalen, “Ogō eit nē mala anim, idi mugu mugu nigin bret na talouf are, tunī to dō dilouf.”

8 In dō fiya tamo taka Endru, Simon Pita nē tura anī Jesus irokenen,

9 “Kesu taka yeir baali bret faif gau uru ado, anim musei ganan enei tau kisi falauf?”

10 Jesus iron, “Tamo kayau urokenēdig len, dibod.” Modoū anī bun fisir musei ado, an tamo dibodadan faif tausen age fiya.

¹¹ Gama Jesus bret anī geif, Negur de fiye ken, idi dibodadan neid oroya kilei, anī gadō fedin. Ī gau buneg de age fen.

¹² Idi ganan dō kisi fele di, Jesus in dō fiya tar irokenēdin, “Tunī ditoraram anī kurug. To sekil fiyauf.”

¹³ Anī nigin, baali bret faif anī idi dokon, masak tunī ifaredin anī kuru dife di, karam tuwelf isokosedin.

¹⁴ Tamo kayau memelik inon anī dile fen, idi diron, “Momoi bagai, enei are Profet teneub enei bun isiyouf ya anī.”

¹⁵ Idi disi, Jesus king ibodōf nigin nugo difiyēf ya anī, ī kelei ken, baban mugu arein kel iselen.

*Jesus Naan Teteatu Iyon
(Matyu 14:22-33; Mak 6:45-52)*

¹⁶ Gugumek isi di, yogon dō fiya tar daliyoun disilen.

¹⁷ An idi waag taka bun sosō de daliyou dibal fen, Kapenaum luwe dile mog, mogo gugumen, anī Jesus fau idi garan to isin.

¹⁸ Yau totol isi di, maaī moloun wī yen.

¹⁹ Idi waag sur de dira ken, ful de dile, faif kilomita be, sigis kilomita age fiya mog, Jesus naan tetenem waag garan iyok isi mog, dile fen, kumī tererē den.

²⁰ Anī ere, ī idi irokenēdin, “Are ayam, to kumī wog.”

²¹ Age ye di, ī waag bun dalesnēf nigin waud yenen, kaisā bagai, idi dilauf nē waud iron ub anī bun, waag gorō fen.

22 Naa taka di, tamo kayau daliyou ub sitakā difaren idi kelein, waag tekelei dogol an ibodon, anī Jesus in dō fiya tar geid to sō den, idi dogo dogol dilen.

23 Waag tunī Taiberias temeleid, Odug, bret Negur de fkiye ken, tamo kayau ifeneīd don modoū anī non, goro difen.

24 Tamо kayau, Jesus in dō fiya tar geid an to dibodon anī kelei ken, idi waag sosō de fen, Jesus dimirnēf nigin Kapenaum dilen.

Jesus Mata Nē Bret

25 Sain tamo kayau idi, daliyou sitakā Jesus fotou dife fen, idi ī to difiyen, “Rabi, ere sain õ ein usin?”

26 Jesus aitedin yalen, “Aya ã momoi bagai arokeneik, ã aya umirnagef, ã memelik ulegen nigin sā, anī ere, ã bret ifoutneī di, wōg eweī gere fen nigin.

27 Saaf sane ledig anī nigin to kabī waleg, anī ere, saaf to sane le fen, mata faimud ibodkeleya bun ibodōdig anī nigin kabī waleg, are Tamо Naalem ifeneīf. ī dogol Tama Negurem igirne ken, yoya nē megeir ganan ifenen.”

28 Age ye di, idi ī to difiyen, “Amā Negur nē kabī malouf nigin, naig bagai mafouf?”

29 Jesus soloif iron, “Negur nē kabī are yeir, Negurem sur fiyen ī nigin momoi gouf.”

30 Anī nigin, idi ī to difiyen, “Ere memelik bun uris wanamā di, mail fen, õ momoi mayōf? Ere anī õ unouf?

31 Amā nemā tubumā tar gerere tuan mana don, Negur nē Itotoya bun eig ye yenek kilei, ī idi saa ilun tamal bret dāf nigin ifenēdin.* ”

32 Jesus idi irokenēdin, “Aya ã momoi bagai arokeneik, Moses im bret saa ilun tamal to ifenein, anī ere, neu Dei ī yogo bret kaū bagai saa ilun tamal ifeneik.

33 Ere nigin, Negur nē bret saa ilun tamal isi fen, teneub enei mata ifenek.”

34 Idi diron, “Odug, gama ilauf enei bun bret anī wanamā.”

35 Jesus idi irokenēdin, “Aya anī mata nē bret. Taka ī aya bun isif, to bagai naū ilauf, taka ī aya nigin momoi yef, to bagai naan ail fouf.

36 Anī ere, aya ã arokenein kilei, ã mogo uleyagen, anī fau to momoi gef.

37 Idi ganan Deim ifanaf, aya bun disiyouf, taka ī aya bun isif, aya to bagai aruwauf.

38 Aya saa ilun tamal asin, aya neu oroya dō afouf nigin sā, anī ere, aya sur fiyan nē oroya dō afouf nigin.

39 Aya sur fiyan nē oroya are yeir, idi ganan ī ifanan taka to folō afalauf, anī ere, aya idikeleya naa bun alesnēdiyouf.

40 Neu Dei nē oroya anī, taka ī Naal ile fen, ī nigin momoi yef, mata faimud ibodkeleya yalouf, idikeleya naa bun aya alesnēf.”

41 Od enei Juda tamo karī de fen, ī nigin nauseir den, ere nigin, Jesus iron, “Aya bret saa ilun tamal asin.”

* **6:31:** Eksodas 16:4; Nehemaia 9:15; Sam 78:24, 25

42 Idi diron, “Eĩ Jesus sã de? Josef naal, in sina tama ado ada keleĩ. Naig fe di, ũ irok, ‘Aya saa ilun tamal asin?’”

43 Jesus solof iron, “Ã aug to nauseir gouf.

44 Taka yogen oroyam, aya wageun isiya kisi feleya sã, anĩ ere, Dei aya sur fiyan inim, ũ namen kabĩ yale fen, aya garan irou isiyouf. Age fe di, idikeleya naa bun, aya ũ alesnẽf.

45 Profet neid itotoya bun eig ye yenek, ‘Idi ganan Negurem ifelnẽdiyouf.’[†] Taka ũ Dei karĩ fiye ken, ũ bun keleĩ yalef, aya bun isidig.

46 Taka nem Dei to ilen, Negur bunem isin im dogol. ũ yogo dogol Dei ilen.

47 Aya ã momoi bagai arokeneik, taka ũ momoi yef, mata faimud ibodkeleya ado.

48 Aya mata nẽ bret.

49 Ägenei tubuĩ tar gerere tuan mana don, anĩ ere, idi gare den.

50 Anĩ ere, bret enei saa ilun tamal isif, are tamo yãf, to laa fouf.

51 Aya mata ibodõya bret, are saa ilun tamalem isin. Taka ũ bret enei yoko, ũ mata faimud ibodõf. Bret enei aya bouwau, are teneub ganan bun, tamo kayau mata dalouf nigin afenẽdiyouf.”

52 Age ye di, Juda tamo dogo dogol fatuk bagai luwa diroun, “Naig fe fen, tamo enei yogen bouwa ifanada tãf?”

53 Jesus idi irokenẽdin, “Aya ã momoi bagai arokeneik, ã Tamo Naal nẽ bouwa to wãgauf, in naud to wãgauf are, ã namein mata to ibodok.

[†] **6:45:** Asaia 54:13

54 Taka ī neu bouwau yokon, neu naudou yoko, ī mata faimud ibodkeleya ado, anī aya fau idikeleya naa bun alesnēf.

55 Ere nigin, neu bouwau are saaf bagai, neu naudou are naan bagai.

56 Taka ī neu bouwau yokon, neu naudou yoko, ī aya nameun ibodok, aya ī namen abodok.

57 Mata ibodōya Dei aya sur fiya di, aya Dei bunem mata abodok gen, taka ī aya yōyāf, aya bunem mata ibodōf.

58 Bret enei saa ilun tamal isin. Āgenei tubuī tar mana don are gare desin, anī ere, taka ī bret enei yoko, faimud mata ibodkalauf.”

59 Ī od enei Kapenaum taun an, Juda neid uub fō bun ifelneīd fen, wogō yen.

In Dō Fiya Tar Musei Jesus Ditornen

60 Od enei karī de fen, in dō fiya tar musei diron, “Ifelnadaf eī totol bagai. Aim anī keleī youf?”

61 In dō fiya tar od enei nigin nauseir de di, Jesus anī kelei ken, idi irokenēdin, “Od enei ā morō ifeneik de?

62 Ba, Tamo Naal ī ibodon nē kel isel mog ulogouf are, ā ere kisi gouf?

63 Awa Uurem mata ifenēdig, bouwa are gorō. Od aya wogō ayein are Uur, od anī mata ifenēdig.

64 Anī ere, ā tunī momooya sā.” Ere nigin, Jesus idi nigin gariya bun kelein, aiyaim ī nigin to momoi den, aim ī nigin kiwai inouf.

65 Ī od tobol fe iron, “Anī nigin, aya od enei arokenein, Dei ī nigin wau to yalouf, ī aya bun isiya kisi feleya sā.”

66 Od enei bunem, in dō fiya tar musei keku den, baban Jesus to dō difiyen.

67 Jesus in dō fiya tar tuwelf to fedin, “Āg aya utornag ulagauf de?”

68 Simon Pita solof iron, “Odug, amā ai bun malauf? Ō mata faimud ibodkeleya nē od ado.

69 Amā momoi mau fen, keleī, õ anī Negur nē Fateul.”

70 Age ye di, Jesus idi irokenēdin, “Tuwelf ā ayam to agirnein de? Anī ere, ā atun taka are Satan.”

71 (I Judas, Simon Iskariot naal nigin kisif fen, iron. Idi tuwelf anī taka Judas, fau dum Jesus kiwai ifenen.)

7

Jesus Salafat Nē Sifa Bun Ilen

1 Enei dumen, Jesus Galili an iyon, Judia distrik so fiyen, ere nigin, an Juda tamо ī dukesiyouf nigin ololo difen.

2 Anī ere, Juda neid Salafat nē Sifa naa melsā di,

3 Jesus tura tarem ī dirokenen, “Ō ein utor ken, Judia ulauf, ago di, ogon dō fiya tar, memelik uno di, dilouf.

4 Tamо taka ī, tamо kayau meleid bun mala yaor wō you fenē, ī iminēyan kabī to yaledig. Ō eneidi agof, õ ogo tamо kayau ganan ufelnēdiyouf.”

5 I yogan tura tar bagaig, ī nigin to momoi den.

6 Anī nigin, Jesus idi irokenēdin, “Aya neu sain bagai fau isiya sā, ā nigin sain ganan kisi feleya bagai.

⁷ Tenebur tamo kayau idi, ã to kiwai difeneik, aya nigin kiwai, ere nigin, ereb sane age difef anĩ kurõ afesidig.

⁸ ã Sifa bun ulagauf, aya nigin fau Sifa enei bun to eselauf, ere nigin, neu sain bagai fau isiya sã.”

⁹ Jesus od enei wogõ yel fen, Galili distrik an ibodon.

¹⁰ Anĩ ere, tura tar Sifa bun diselel mog, ĩg iselen, anĩ ere, mala yaor sã, iminẽyan.

¹¹ Sifa bun, Juda tamo idi, ĩ nigin meleid dino fen, to difen, “Tamo are nain?”

¹² Tamo kayau atun, ĩ nigin fatuk bagai kosesẽ kurã den. Tunĩ diron, “Ĩ tamo biya.”

Tunĩ solo de diron, “Eo, ĩ tamo kayau idegnẽdidig.”

¹³ Anĩ ere, taka nem ĩ nigin yaor to kurõ fesin, ere nigin, idi Juda tamo nigin kumĩ den.

Jesus Sifa Bun Ifelnẽdin

¹⁴ Sifa mogo atusil ifar mog, Jesus tempel modoũ bun isel fen, od ifelnẽdin.

¹⁵ Juda tamo idi terẽ de fen, diron, “Tamo enei tai fiya yaleya sã mog, naig fe fen, keleĩ eig fiya ado?”

¹⁶ Jesus solof iron, “Neu ifelnẽya are neu sã, aya sur fiyan ĩ bunem isif.

¹⁷ Taka ĩ Negur nẽ oroya dõ fiya nigin orof are, neu ifelnẽya Negur bunem isif be, aya neu oroya nem wogõ auf be anĩ, ĩ keleĩ youf.

¹⁸ Taka ĩ yogon kisim wogõ yef are, ĩ yogo yana yaleseya nigin age fef, anĩ ere, taka ĩ sur fiyen nẽ yana yaleseya nigin kabĩ yalef, tamo are momoi nẽ. ĩ bun idegẽya taka sã.

19 Moses lo anī to ifenein de? Anī ere, ā atun, taka nem lo to dō fedig. Ere nigin ā aya unakesigouf nigin ago gef?”

20 Tamo kayau solo de diron, “Ō kaa sane ado. Aim ō inokesiyouf nigin age fef?”

21 Jesus idi irokenēdin, “Aya memelik taka ano di, ā ganan terē gen.

22 Anī ere, Mosesem mulū ileya ifenein nigin, ā kesu Sabat naa bun mulū ileya wenēgedig (mulū ileya are, Moses bunem to isin, teneub te bunem isin).

23 Moses nē lo to wal gouf nigin, Sabat naa bun kesu nē mulū ileya wenēgedig, ere nigin aya Sabat naa bun, tamo bou adok el afe di, ā aya nigin nameī sanedig?

24 Mala yaor anī dogol uleg fen, to es gei, tutuk bagai el ge, es gei.”

Jesus Anī Kristus De?

25 Sain anī bun, Jerusalem tamо kayau tunī diron, “Tamo enei are idi ī dukesiyouf nigin age difef anī sā de?

26 Ī de yeir, mal atun wogō ye di, ereb od taka to dirokenek. Mudur adodo idi, ī anī Kristus ya anī mogo tutuk keleī de?

27 Anī ere, tamо enei nain be tamal, are amā keleī. Sain Kristus isiyouf, taka nem ī nainenem be isif to keleī youf.”

28 Age de di, Jesus fau tempel modoū bun ifelneīd fen, iweig iron, “Are de, ā aya nigin keleī, aya nainenem asin are ā keleī. Aya ein neu oroyam to asin, anī ere, ī aya sur fiyan are momoi. Ā ī keleī sā,

²⁹ anī ere, aya ī keleī, ere nigin, aya ī bun tamal, im aya sur fiyan.”

³⁰ Od enei bun, idi ī dirounēf nigin age difen, anī ere, taka nem ī bun ima to inon, ere nigin, yogon sain fau isiya sā.

³¹ Anī ere, tamo kayau musei fau ī nigin momoi de fen, diron, “Sain Kristus isiyouf, ī memelik tamo enei inodif anī wal fiya inodiyouf de?”

³² Tamo kayau ī nigin age de, kosesē kurā de mog, Farisia tamo idi karī den. Age de fen, pris odudug Farisia geid, tempel lo fiya tamo Jesus dalouf nigin sur difedin.

³³ Jesus iron, “Aya ā geid sain modeg tabodok, age afe fen, aya ī aya sur fiyan bun alauf.

³⁴ Ā aya umirnagauf, anī ere, ā to fotou wiyagauf. Aya abodōf nē an, ā isiya kisi feleya sā.”

³⁵ Juda tamo abob dirokenen, “Tamo enei nari bagai ile di, anī ada ī to fotou tafouf? Ada neda tamo kayau firagagaū difen, Grik tamo kayau atun dibodok nē an, ī ile fen, Grik tamo kayau ifelnēdiyouf de?

³⁶ Ere gariya nigin ī iron, ‘Ā aya umirnagauf, anī ere, ā to fotou wiyagauf. Aya abodōf nē an, ā isiya kisi feleya sā?’”

³⁷ Sifa naa odug idikeleya bun, Jesus ifar fen, iweig iron, “Taka ī naan ail fouf, aya bun isi fen, naan yāf.

³⁸ Taka ī aya nigin momoi yef, Negur nē Itotoya iron kilei, warur naan ī namenem ulo ulō yef yenēf.”

³⁹ Ī od enei Awa Uur nigin wogō yen, are idi Jesus nigin momoi den anidi fau dalouf. Sain anī

bun, Awa Uur isiya san, ere nigin, Jesus fau fula fiya medeīya yaleya sā.

40 Od enei karī de fen, tamo kayau tunī diron, “Momoi bagai, tamo enei Profet ada tari tafeñ anī.”

41 Tunī diron, “Í Kristus.”

Tunīg diron, “Kristus ouf are, naig fe fen, Galilim isiyouf?”

42 Kristus Dawid nē ibor bunem, Betlehem taun Dawid ibodon nē anenem isiyouf, anī Negur nē Itotoya to irok de?”

43 Anī nigin, tamo kayau Jesus nigin fara furu difen.

44 Tunī Jesus ka difiyēf nigin age difen, anī ere, taka nem ï bun ima to inon.

Juda Neid Mudur Adodo Momoiya Sā

45 Tempel lo fiya tamo idi, pris odudug Farisia tamo gedin keku de dile di, to difedin, “Ere nigin ã ï to urou usigel?”

46 Tempel lo fiya tamo solo de diron, “Taka nem, tamo enei wogō yedig gen to wogō yedig.”

47 Farisia tamo solo de diron, “Í ãg idegnein de?

48 Mudur adodo Farisia tamo geid atun, taka ï nigin momoi yen de?

49 Sā, anī ere, tamo kayau eneidi idi lo keleī sā, idi Negurem gelu fedif.”

50 Nikodemus, idi neid taka, tetunem Jesus garan ilen, ï irokenēdin,

51 “Ada neda lo bun, taka ï ereb age fef anī ileya nigin ketem karī tafiye ken, es tafedig. Age fiya sā de?”

⁵² Idi solo de diron, “Õg Galili tamal de? Umir ken, fau keleñ youf, profet taka Galilim to isif.”

[Itotoya tunĩ kulu bagai od gariya dino fen, ditoton anĩ bun, Jon 7:53-8:11 to ibodok.]

⁵³ Age de fen, idi mugu mugu dogo neid fonõ fonõ dilen.

8

¹ Anĩ ere, Jesus Moul Arei bun iselen.

² Bonimei mumurei ado, ï baban tempel modoũ bun wõ yen, an tamo kayau ganan guru de salili difiyẽ di, ï ifelnëdiyouf nigin ibodon.

³ Lo ifelnëdiya tamo Farisia tamo geid idi, kayau taka noli ye mog, dale dirou disi, guru fiya mala bun dinenẽ di, ifaren.

⁴ Age dife fen, Jesus dirokenen, “Tise, kayau enei noli tobununã ino di, malel.

⁵ Lo bun, kayau age fediya meein tulu fiya nigin Moses irokanaman. Gama õ ere wof?”

⁶ Idi ï bou bun od yüya nigin kor dino fen, age de, to difiyen.

Anĩ ere, Jesus obũ yeis fen, ima gegem teneub bun itoton.

⁷ Idi ï to difiyetu di, ï fã ye, saules fen, irokenëdin, “Ã atun, aib taka ï mosor sãf, ï ketem kayau bun meein irãf.”

⁸ Baban ï obũ yeis fen, teneub bun itoton.

⁹ Idi od anĩ karĩ de fen, idi mugu mugu ul de, diyalelen, biyedim uyu dirou di, age de dile, Jesus kayau ifaren anĩ ado dogol ditornëdin.

¹⁰ Jesus saules fen, kayau to fiyen, “Kayau, idi nai difef? Idi takam baban õ bun od to yuk de?”

¹¹ Kayau iron, “Odug, takam to agefef.”

Jesus iron, “Ayag õ boũ bun od to auk. Ule fen, sain enei ilauf ganan, mosor baban to uno.”

Jesus Nē Wogōya Are Momoi

¹² Jesus baban tamo kayau irokeneid fen, ĩ iron, “Aya tenebur enei nē fula fiya. Taka ĩ aya dō fiyauf, ĩ gugum namen to bagai iyōf, anī ere, ĩ mata nē fula fiya adouf.”

¹³ Age ye di, Farisia tamo idi Jesus dirokenen, “Õ ogo nigin wogō wof, anī nigin, ogon wogōya are, momoi be sā be anī yaor sā.”

¹⁴ Jesus solof irokenēdin, “Aya yug nigin wogō auf, anī ere, neu wogōya are momoi, ere nigin, aya nainenem asin, nain be alauf anī, aya keleī. Anī ere, ā, aya nainenem asin, nain be alauf anī, keleī sā.

¹⁵ Ā tamo nē tobununā bunem es gedig, aya aib taka to es afedig.

¹⁶ Anī ere, aya es afouf are, neu es fiya are tutuk, ere nigin, aya mugu sā. Aya Dei inim sur fiyan ado mafaref.

¹⁷ Agenei Lo bun itotoya irok, tamo urom wogō tekelei dinof, are momoi.

¹⁸ Aya yug nigin kurō afalaisidig, age afe di, Dei aya sur fiyan ĩ, aya nigin kurō fesidig.”

¹⁹ Age ye di, idi Jesus dirokenen, “Õ tamā nain?”

Jesus solof iron, “Ā aya nigin ado neu Dei nigin neg keleī sā. Ā aya nigin keleim are, neu Dei nigin neg keleim.”

²⁰ ĩ tempel bun kolekta inoya nē modoū non ifelneid fen, od enei wogō fiyēdin. Anī ere, takam ĩ to ima ka fen, ere nigin, in sain fau isiya sā.

²¹ Jesus baban idi irokenēdin, “Aya atorneī di, ã umirnagauf, agog fen, ã āgenei mosor bun gare gouf. Aya elef nē an, ã isiya kisi feleya sā.”

²² Anī bunem, Juda tamo idi diron, “Ĩ yogo bouwa yukesiyouf de? Anī nigin, ĩ, ‘Aya elef nē an, ã isiya kisi feleya sā,’ yef de?”

²³ Anī ere, Jesus tobol fe fen, irokenēdin, “Ã tenebur temeleī, aya ilun temelou. Ã teneub enei nē, aya teneub enei nē sā.

²⁴ Anī nigin, aya, ã āgenei mosor bun gare gouf ayein. Aya yug nigin, aya im audig anī, to momoi gouf are, ã momoi bagai āgenei mosor bun gare gouf.”

²⁵ Age ye di, idi ĩ to difiyen, “Õ ai?”

Jesus idi irokenēdin, “Aya aib anī, mogo gariya bunem arokeneik asin.

²⁶ Aya ã nigin wogōya musei ado, es fiya nigineg musei. Anī ere, sur fiyan ĩ, momoi bagai, anī nigin, ereb aya ĩ bun karī aun anī, tamo kayau tenebur ein arokenēdif.”

²⁷ Idi, ĩ Tama nigin irokenēdif ya anī, to kisi fokō yen.

²⁸ Anī nigin, Jesus iron, “Sain ã Tamo Naal walesagauf bun, aya yug nigin aya im audig anī, ã keleī youf, aya neu oroyam ereb takā to age afedig, anī ere, aya Dei ifelnan anī dogol wogō audig anī, ã keleī youf.

²⁹ Aya sur fiyan ĩ, amā urom mabodok, ĩ mugu to itornal, ere nigin, aya faimud, ereb ĩ wau al fouf anī, age afedig.”

³⁰ Age wogō ye di, musei ĩ nigin momoi den.

³¹ Jesus, Juda tamo ī momoi difiyen anidi irokenēdin, “Aya afelnein anī uroug tokō walagauf are, ā momoi bagai neu dō fiya tar.

³² Agog fen, ā momoi anī keleī youf, momoi anim kafī fiya bun tamal yalelneīf.”

³³ Idi aiten dale dirokenen, “Amā Abraham nē ibor nē tubu tar, amā aib taka nē ferfer to mabodon. Ere wo fen, amā kafī fiya bun tamal yalelnamāya nigin urok?”

³⁴ Jesus aitedin yale iron, “Aya ā momoi bagai arokeneik, taka ī mosor inof are, ī mosor nē ferfer.

³⁵ Ferfer ī, ibor anī bun gai ibodkeleya modoū sā, anī ere, modoū are naal nē faimud ibodkalauf.

³⁶ Anī nigin, Naal ī kafī fiya bun tamal yalelneīf are, ā momoi bagai karika lauf.

³⁷ Ā Abraham nē ibor nē tubu tar are, aya keleī. Anī ere, ā aya unakesigouf nigin dodok gef, ere nigin, ā neu od nē modoū namein to ibodok.

³⁸ Ereb aya Dei mala bun ailen anī, aya ā arokeneik, āg ereb āgenei temeī bun karī gen anī ago gedig.”

³⁹ Idi aiten dale dirokenen, “Abraham ī tamamā.”

Age de di, Jesus iron, “Ā Abraham gere tarem are, Abraham age fedin anī ago gem.

⁴⁰ Gama ā, aya Negur bun momoi anī karī au fen, arokenein anī, unakesigouf nigin naab umirēgef. Abraham ī to age fen.

⁴¹ Ā temeī age fedig anī ago gef.”

Age ye di, idi Jesus dirokenen, “Amā seseirā inoya naab bun temelamā sā. Nemā Tamamā are Negur yogo dogol.”

Satan Gere Tar

⁴² Jesus idi irokenëdin, “Negur ī Temeim are, ã aya nigin wauī laa fem, ere nigin, aya Negur bunem asi fen, yeir afaref. Aya neu oroyam to asin, im sur fiyan.

⁴³ Ere nigin neu od nigin wauī to fokō yef? Are aya wogō auf anī, ã karīya kisi feleya sā nigin.

⁴⁴ Ñ, temeī Satan nē, anī nigin, ã temeī nē oroya dō fiya nigin oroyeik. ī gariya bunem isin, ī yukesiya kaa, momoi to iroudig, ere nigin, ī namen momoi sā. Ereb sain ī idegēya od wogō yedig, ī yogon od bagai wogō yedig, ere nigin, ī kori tamal, idegēya tama.

⁴⁵ Anī ere, aya momoi anī wogō audig nigin, ã to momoi wiyagedig!

⁴⁶ Ñ takam, aya neu mosor anī tau kurō fesiya kisi feleya? Aya momoi wogō auf are, ere nigin ã to momoi wiyagef?

⁴⁷ Aib ī Negur nē, ī Negur ereb yef anī karī yedig. Ñ to karī gef anī nē gariya are, ã Negur nē sā nigin.”

Jesus Yogo Nigin Iron

⁴⁸ Juda tamo aiten dale dirokenen, “Amā ō Samaria tamal, kaa sanem irounon mauf are, momoi to morok de?”

⁴⁹ Jesus soloif iron, “Aya kaam to irounan, anī ere, aya neu Dei yana seli abidig, ã aya selu to wabigedig.

⁵⁰ Aya Yug nigin fula fiya medeīya to amirek, anī ere, taka ī anī imirek are ibodok, ī anī es fiya tamo.

⁵¹ Aya ã momoi bagai arokeneik, taka ĩ neu od irou kafĩ falauf are, ĩ laa to bagai gurug fouf.”

⁵² Juda tamo, anĩ bun Jesus dirokenen, “Gama amã keleĩ, õ kaa sanem irounon! Abraham laa fen, profeteg gare den, anĩ ere, õ, taka ĩ ogon od irou kafĩ falauf are, ĩ laa to bagai kobũf ilouf, wof.

⁵³ Ō tamamã Abraham wal fiya de? ĩ laa fen, profeteg age difen. Ō kisi wof, õ ai?”

⁵⁴ Jesus aitedin yale iron, “Aya yug selu alesauf are, neu seli alef are ege. Neu Dei, ĩ anĩ āgenei Negur gef, ĩ aya yanau yalesedig.

⁵⁵ Ā ĩ keleĩ sã, anĩ ere, aya ĩ keleĩ. Aya ĩ keleĩ sã auf are, aya ã gen idegẽyã tamouf, anĩ ere, aya ĩ keleĩ bagai, in od dõ afedig.

⁵⁶ Temeĩ Abraham ĩ, neu naa anĩ ilouf nigin kisif fen, wau al fen. ĩ anĩ mogo ile fen, kulĩ yen.”

⁵⁷ Anĩ nigin, Juda tamo Jesus dirokenen, “Ō fau yar fifti yaleya sã, anĩ õ mogo Abraham ulen de?”

⁵⁸ Jesus idi irokenëdin, “Aya ã momoi bagai arokeneik, Abraham gõ fiya sã mog, aya abodon.”

⁵⁹ Anĩ nigin, idi ĩ meein tulu difouf nigin meein gei difen, anĩ ere, Jesus bouwa inokel fen, tempel modoũ bun tamal iya ilen.

9

Jesus Tamo Taka Mala Ifofakeleya Gõ Difyen Anĩ El Fiyen

¹ Jesus iyok ile fen, tamo taka mala ifofakeleya gõ difen anĩ ilen.

² In dõ fiya tar Jesus to difiyen, “Rabi, aim mosor ino di, ĩ mala ifofakeleya gõ difen, tamo enei yogo de, sina tamam de?”

³ Jesus aitedin yale iron, “Tamo eneimeg sā, sina tama adomeg sā, anī ere, Negur nē kabī ī bunem yaorouf nigin eig fiya wō yen.

⁴ Eī fau gaa ado, aya sur fiyan in kabī talouf bagai. Bō fau isif, sain anī, taka nem kabī yaleya kisi feleya sā.

⁵ Sain aya tenebur abodok, aya teneub enei nē fula fiya.”

⁶ Age wogō yel fen, ī tenebur isis fen, salina buru ado falei fe fen, tamo mala bun inon.

⁷ Jesus ī irokenen, “Ule, Siloam naan kukor ugū” (Siloam nē gariya, are ‘Sur fiyen’). Anī nigin, tamo ile, naan igun, agefen, mala kelē yel, fō bun isin.

⁸ In fō tura tar ado, idi ī nonī ye mog diledig anidi diron, “Tamo de eneim ibod ken, nonī yedig anī sā de?”

⁹ Idi tunī diron, “Im.”

Tunī diron, “Im sā, taka ī genem.”

Anī ere, ī yogo iron, “Aya de tamo anim.”

¹⁰ Idi ī dirokenen, “Naig fe di, õ malā kelē yeledin?”

¹¹ Ī aitedin yale iron, “Tamo yana Jesus dedig im, buru falei fe fen, malau uru bun inodin. ī, aya ele, Siloam naan agūf nigin irokanan. Anī aya ele, naan agun, age afe fen, aya malau kelē aun.”

¹² Idi ī to difiyen, “Tamo are nain?”

Ī iron, “Aya keleī sā.”

Farisia Tamo Idi Mala El Fiyen Nē Gariya Dimiren

¹³ Idi tamo mala ifofakelen anī, Farisia tamo gedin dale dirou disin.

¹⁴ Jesus buru falei fe fen, tamo mala el fedin nē naa are Sabat naa.

¹⁵ Anī nigin, Farisia tamo idig, ī naig fe fen, mala kelē yedin anī to difiyen. Tamō are irokenēdin, “Ī malau buru inodin, age fe di, agun, anī aya gama kelē auf.”

¹⁶ Farisia tamo tunī diron, “Tamo enei Negur bun tamal sā, ere nigin, ī Sabat naa to dōfef.”

Anī ere, tunī diron, “Naig fe di, mosor tamo memelik age fediya inoya kisi feleya?” Anī nigin, idi fara difen.

¹⁷ Idi baban tamo mala ifofakelen anī diroke-nen, “Ī ō malā el fen anī, ō ī nigin ere wof?”

Age de di, ī iron, “Ī profet.”

¹⁸ Juda tamo idi, tamo mala ifofakeleya mala kelē yelen anī, fau to momoi den. Anī nigin, idi tamo anī sina tama diweignēdin.

¹⁹ Idi to difen, “Eī ā naaluī de? De ī anī mala ifofakeleya gō mafen gef? Naig fe di, ī gama sā mala kelē yelef?”

²⁰ Sina tama diron, “Amā keleī, ī nemā kesu, anī ī mala ifofakeleya gō mafen.

²¹ Anī ere, ī naig fe fen, gama sā lofef, aim ī mala el fedin anī, amā keleī sā. Yogo to wiyēg, ī biya, yogo nigin wogō youf.”

²² Sina tama idi, Juda tamo kumī difiyeīd fen, age de diron, ere nigin, Juda tamo idi mogo od difon, aib takā Jesus anī Kristus youf are, Juda neid uub fō bun dalelnēf.

²³ Age fiya nigin, sina tama eig de diron, “Ī biya, yogo to wiyēg.”

²⁴ Baban Juda tamo idi, mala ifofakelen anī diweigne ken, diron, “Negur yana wales fen,

momoi nē od dogol urōf, amā keleī, tamo are mosor tamal.”

²⁵ Ī solof iron, “Ī mosor ado be sā be, aya keleī sā. Tekelei aya keleī are, aya malau ifofakelen, anī ere, gama lo afedig.”

²⁶ Age ye di, idi ī to difiyen, “Ī ō ere naig yon? Naig fe di, ū malā birikā fedin?”

²⁷ Ī aitedin yale iron, “Aya ā mogo arokenein, anī ere, ā to karī gen. Ere nigin ā baban karī gou fenē? Āg in dō fiya tar wowā gou fenē de?”

²⁸ Age ye di, idi kono difiye ken, diron, “Ō tamo enei nē dō fiya taka! Amā are Moses nē dō fiya tar!”

²⁹ Negur Moses wogō fiyen are amā keleī, anī ere, tamo enei nigin, ī nainenem isin areg, amā keleī sā.”

³⁰ Tamо anī aitedin yale irokenēdin, “Ago ge di, terē auf. ī nainenem isin, ā keleī sā, anī ere, aya malau birikaū fedin.

³¹ Amā keleī, Negur ī mosor dinodidig anī to karī fiyēdidig, anī ere, taka ī Negur anini fiye ken, Negur nē oroya dō fef are, Negurem ī karī fiyēdig.

³² Gariya bunem isi gama, taka nem, tamo mala ifofakeleya gō difen anī birikā fedin yeya to karī yedig.

³³ Tamо enei Negur bun tamal sam are, ī ereb taka to naig fem.”

³⁴ Age ye di, idi diron, “Ō mosor barikā gō diyon, naig fe di, ū amā ufelnamak?” Age de fen, idi ī mayarē diru dirā di, isin.

³⁵ Jesus, idi tamo anī serē diran yeya anī karī yen. Jesus ī fotou fiye ken, iron, “Ō Tamo Naal nigin momoi wof de?”

³⁶ Tamo to fen, “Odug, ai anī ī? Urokana di, aya ī nigin momoi auf.”

³⁷ Jesus iron, “Ō gama ī ulel, de ī anī urom wogō gef.”

³⁸ Age ye di, tamo iron, “Odug, aya momoi auf.” Agef fen, ī Jesus seli yabin.

³⁹ Jesus iron, “Es fiya nigin aya tenebur ein asin, are mala ifofakeleya meleid kelē youf, age fe di, idi meleid kelē yef, are meleid ifofakalauf nigin.”

⁴⁰ Farisia tamo tunī Jesus geid difaren anī, agef wogō ye di, karī de fen, to difen, “Ere? Amāg malamā ifofakeleya de?”

⁴¹ Jesus iron, “Ā momoi bagai meleī ifofakeleyam are, ā mosor sam, anī ere, gama ā malamā kelē yef gef, anī nigin, āgenei mosor fau ibodok.

10

Sipsip Lo Fiya Tamo Yogan Sipsip Geid

¹ “Aya momoi bagai arokeneik, tamo taka ī, sipsip nē kauwor bobog bunem to ilauf, anī ere, naab taka bunem gar ye isilauf are, ī bē tamo, bē yaledig.

² Tamo ī bobog bunem ilef are, ī yogo sipsip marau.

³ Lo fedig tamo ī bobog kāf kenēdidig, age fe di, sipsip ī ait karī dedig. ī yogan sipsip yana yaleid fen, mayarē guri feid, irouledig.

⁴ Sain ī yogon ganan mayarē guri feid iroule fen, ī ketem uyu iledig, age fe di, yogon sipsip dō difedig, ere nigin, idi yogon ait keleī.

⁵ Anī ere, idi tamo urug to dō difedig, idi ī mā diyawauf, ere nigin, ī ait urug nigin idi keleī sā.”

⁶ Jesus yaab od enei nem wogō fwyēdin, anī ere, ī idi erek gariya nigin irokenēdin anī, idi to kelein.

⁷ Anī nigin, Jesus baban iron, “Aya ā momoi bagai arokeneik, aya sipsip neid bobog.

⁸ Ganan uyulil disin are, idi bē tamo, bē daledig, anī ere, sipsip idi to karī difiyēdin.

⁹ Bobog are aya, taka ī aya bunem isiyouf are, mata kel yalouf. ī namen isi fen, ulō yeis ilauf, agef fen, fisir yōya nē fotou fouf.

¹⁰ Bē tamo are bē nigin, yukesiyouf nigin ado, narī fouf nigin dogol isif, aya idi mata dale fen, barikāuf nigin asin.

¹¹ “Aya sipsip lo fiya tamo biya, sipsip lo fiya tamo biya, yogon mata sipsip nigin itorōdig.

¹² Oroi tamo are ī sipsip marau sā. Anī nigin, ī gaū kuī isi di, ile fen, sipsip itorarā iyadig. Age fe di, gaū kuī sipsip kaka feid fen, firagagaū fedidig.

¹³ Tamō are iyadig, ere nigin, ī oroi tamo, sipsip nigin to karī yedig.

¹⁴ “Aya sipsip lo fiya tamo biya, aya neu sipsip keleī, neu sipsip idi aya keleī,

¹⁵ are Dei ī aya keleī, aya Dei keleī gen. Anī nigin, aya neu mata sipsip nigin atorok.

¹⁶ Aya sipsip tunī ado, are sipsip kau enei bun temeleid sā, aya idig de guri afeid, arou asiyouf. Idig aitou karī douf, age fe di, idi uū tekelei, sipsip lo fiya tamo tekelei youf.

¹⁷ Neu Dei, aya nigin wau laa fef nē gariya are, aya neu mata baban kel yalouf nigin anī atorok.

¹⁸ Taka nem neu mata to son fiyauf, anī ere, aya neu oroyam neu mata atorok. Aya neu mata itorōya nigin megeir ado, kel yaleya nagineg megeir ado. Od enei neu Dei bun tamal alen.”

¹⁹ Juda tamo od enei nigin baban fara difen.

²⁰ Musei idi diron, “Ĩ kaa sane ado, agef fen, wadak. Ere nigin ĩ karī wiyēgef?”

²¹ Anī ere, tunī diron, “Wogōya enei are, tamo kaa sane ado nē sā. Kaa sane ĩ mala ifofakeleya birikā feleya kisi feleya de?”

Juda Tamo Idi To Momoi Den

²² Sain anī bun, Negur bun Kel Inoya nē Sifa naa Jerusalem wō yen. Are saneya sain.

²³ Anī Jesus tempel modoū bun, Solomon nē Waranda dō fef iyon.

²⁴ Juda tamo guru de, Jesus salili difiye ken, dirokenen, “Sain ganī amā lo wamā di, nene mauf? Ō Kristus ouf are, amā el wo, faded wamāf.”

²⁵ Jesus aitedin yale irokenēdin, “Aya mogo arokenein, anī ere, ā to momoi gef. Memelik neu Dei yana nem anodif, are aya nigin irok.

²⁶ Anī ere, ā to momoi gef, ere nigin, ā neu sipsip sā.

²⁷ Neu sipsip aya aitou karī dedig, aya idi keleī, anī nigin, idi aya dō difiyadig.

²⁸ Aya idi mata faimud ibodeleya afenēdidig, age afe di, idi to bagai inanakalauf. Takam idi imaun tamal to sosoin fiyauf.

29 Neu Dei idi aya ifanan ī, ereb ereb ganan wal fiya. Takam idi neu Dei ima bun tamal son fiya kisi feleya sā.

30 Aya Dei ado tekelei.”

31 Juda tamo baban ī meein tulu difiyēf nigin, meein gei difen.

32 Anī ere, Jesus idi irokenēdin, “Aya Dei bun tamal, ã memelik odudug musei afelnein. Anidi atun nanī anī nigin, ã aya meein tulu wiyagau fenē?”

33 Juda tamo aiten dale diron, “Amā anidi taka nigin meein to tulu mayōf, anī ere, Negur kono fiya nigin, ere nigin, õ tamo maug anī, ‘aya Negur’ wof.”

34 Jesus idi aitedin yale irokenēdin, “Āgenei Lo bun itotoya anī to ibodok de, ‘Aya aron, ã waitou’*?

35 Negur nē od idi bun isin are, Negur idi anī waitou yen. Negur nē Itotoya are narī fiya kisi feleya sā.

36 Age yen ouf are, Dei yagon bagai igirna fen, ein tenebur sur fiyan anī, aya Negur Naal aul anī, ere nigin aya kono afel wiyagef?

37 Aya ereb neu Dei age fedig anī, to age afef are, aya to momoi wiyagauf.

38 Anī ere, aya age afe di, ã neu od to momoi goufeg, memelik anodif anī momoi gouf, anī bunem Dei aya bun ibodok, aya Dei bun abodok ya anī, ã karīg fen, keleī youf.”

39 Idi baban Jesus ka difiyēf nigin age difen, anī ere, ī oreis iyawon.

* **10:34:** Sam 82:6: Negur ī od enei Juda nē es fiya tamo ifenēdin.

⁴⁰ Agef fen, Jesus ī, Jordan naan sitakā, uruwa bun Jon naan igunēdin modoū bun, kel ile, an ibodō di,

⁴¹ tamo kayau musei ī garan disi diron, “Jon memelik taka to inon, anī ere, Jon tamo enei nigin wogō yen ganan, are momoi.”

⁴² Age de fen, an musei idi Jesus nigin momoi den.

11

Lasarus Laa Fen

¹ Gama tamo Lasarus dedig dagin. ī Betani tamal, Maria ī tura Marta ado neid fonō.

² Maria de anim, kulu moul sumeī biya ado, Jesus bun fi fel fen, fatiyam Jesus ye waī fen. ī main Lasarus gama dagi yenek.

³ Anī nigin, main tar Jesus garan od sur difen, “Odug, ī nigin waū laa fedig are dagi.”

⁴ Jesus ī enei karī ye fen, iron, “Dagi eneim to laa ilauf, are Negur nē fula fiya medeīya nigin, anī bunem, Negur Naal yana dalesauf.”

⁵ Marta, tura ado, maineid Lasarus nigin, Jesus wau laa fen.

⁶ Anī ere, Jesus ī Lasarus dagi yenek ya karī ye fen, ī ibodon nē an baban naa uru ibodon.

⁷ Anī bure fele di, Jesus in dō fiya tar irokenēdin, “Ada Judia distrik baban keku tagauf.”

⁸ Anī ere, idi diron, “Rabi, õ gama bagai Juda tamo meein tulu diyōf nigin age difen, anī õ an kel ulau fenē de?”

⁹ Jesus irokenēdin, “Gaa tekelei bun aua tuwelf to ado de? Anī ege aa luwan to ilalauf. Tamo ī gaa

ado iyok, ī ye to tū fedig, ere nigin, ī teneub enei
nē lalan anim lo fedig.

¹⁰ Sain ī bō iyōf are, ye tū fouf, ere nigin, ī lalan
sā.”

¹¹ Enei irokel fen, Jesus idi irokenēdin, “Neda
mou Lasarus ī mulā yenek, anī ere, aya turī afiyēf
nigin an elef.”

¹² In dō fiya tar Jesus solo de dirokenen, “Odug,
ī yenek are, ī fau karikauf.”

¹³ Lasarus laa fen nigin Jesus iron, anī ere, in
dō fiya tar kisi difen, ī mulā yenēya maug bagai
nigin irok den.

¹⁴ Anī nigin, Jesus idi faded feid, irokenēdin,
“Lasarus laa fen.

¹⁵ Ā nigin au fen, aya an to abodon anī nigin,
aya wau alfef, ere nigin, anī bunem ā momoi
gouf. Anī ere, ada ī gein talauf.”

¹⁶ Anī nigin, Tomas Didimus dedig, dō fiya tar
tunī ganan irokenēdin, “Weim gare tauf nigin,
adag talauf.”

Jesus Lasarus Main Tar Waud Wā Fen

¹⁷ Sain Jesus ile wō yen are, Lasarus mogo
matmat bun naa fo ilelen anī karī yen.

¹⁸ Betani are Jerusalem melsā, tri kilomita age
fiya.

¹⁹ Juda tamo kayau musei, Marta Maria ado
maineid laa fen anī, waud yo difouf nigin idi
gedin disin.

²⁰ Marta Jesus isif ya karī ye fen, Jesus fotou fouf
nigin ilen, anī ere, Maria ī fō bun ibodon.

²¹ Marta Jesus irokenen, “Odug, õ ein udobom
are, mainou to laa fem.

²² Anĩ ere, aya keleĩ, gamag õ ereb taka nigin Negur urokenẽf are, ifonõf.”

²³ Jesus Marta irokenen, “Nẽ main baban kel fã youf.”

²⁴ Marta Jesus aiten yale iron, “Aya keleĩ, idikeleya naa kel fãya sain bun, ĩ baban kel fã youf.”

²⁵ Jesus ĩ irokenen, “Aya dogol kel fãya nẽ ado mata nẽ. Taka ĩ aya nigin momoi yef are, ĩ mata ibodõf, laa foufeg, ĩ mata ibodõf.

²⁶ Taka ĩ mata ibod ken, aya nigin momoi yef are, ĩ to bagai laa fouf. Ō enei momoi wof de?”

²⁷ Marta Jesus irokenen, “Momoi, Odug, aya momoi auf, õ Kristus, Negur Naal, teneub enei bun usin.”

²⁸ ĩ agef irokel fen, ĩ kel ile, tura Maria iweigne ken, mugun irokenen. ĩ iron, “Tise yeir, ĩ iweignok.”

²⁹ Maria od enei karĩ ye fen, ĩ kaisã bagai fã yale, Jesus garan ilen.

³⁰ Jesus fonõ wõya sã, ĩ fau Marta fotou fiyen modoũ anĩ bun ibodon.

³¹ Juda tamo kayau, Maria geid, fõ bun dibod ken, ĩ wau wã difenen, ĩ kaisã bagai fã yale, ulõ yeis ile di, dile fen, ĩ matmat bun inã yalouf nigin ilef de fen, dõ difiyen.

³² Sain Maria Jesus ibodon nẽ modoũ anĩ bun wõ ye, Jesus ile fen, ĩ ye gariyan kubũ ye fen, iron, “Odug, õ ein ubodom are, mainou to laa fem.”

³³ Sain Maria inã yalen ado, Juda tamo kayau Maria geid disin idig inã dalen, Jesus anĩ ile fen, wau fatuk bagai gudûf morõ fen.

³⁴ Jesus to fen, “Ĩ nain mû gen?”

Idi diron, “Odug, usi fen, ule.”

³⁵ Jesus ī inā yalen.

³⁶ Age fe di, Juda tamo kayau diron, “Ulegef, ī nigin fatuk bagai wau laa fen anī!”

³⁷ Anī ere, idi tunī diron, “Ī tamo mala ifofakeleya birikā fedin, tamo eneig laa bun ileya nigin katī feleya to kisi feleyan de?”

Jesus Lasarus Laa Bun Tamal Turī Fen

³⁸ Jesus baban wau fatuk bagai gudūf fen, matmat bun isin. Matmat are ku, meein nem bobog katī difelen.

³⁹ Jesus iron, “Meein waleleg.”

Marta, laa tamo nē main iron, “Anī ere, Odug, are gama waai sane, ere nigin, ī an naa fo ibodon.”

⁴⁰ Age ye di, Jesus iron, “Ō momoi wof are, Negur nē fula fiya medeīyā ulouf, to age ayon de?”

⁴¹ Anī nigin, idi meein are dalelen. Age dife di, Jesus itad fen, iron, “Dei, ō aya karī wiyal nigin, ō de ayok.

⁴² Aya kelein, ō faimud aya karī wiyatdig, anī ere, aya tamo kayau yeir difaref nigin od enei orom, are idi onom aya sur wiyan anī momoi douf nigin.”

⁴³ Jesus od enei wogō yel fen, ait odug nem iwegin, “Lasarus, ulō weis!”

⁴⁴ Laa tamo, ye, ima gabar masak nem filu difen ado, nawa gabarem sile difen ulō yesi di,

Jesus idi irokenēdin, “Gabar waleleg fen, utornēge di, ile.”

Jesus Dukesiyouf Nigin Od Difon

(Matyu 26:1-5; Mak 14:1, 2; Luk 22:1, 2)

⁴⁵ Anī nigin, Juda tamo kayau musei Maria gein disin, Jesus ereb age fen anī dile fen, ī nigin momoi den.

⁴⁶ Anī ere, idi tunī Farisia tamo gedin dile fen, Jesus ereb age fen anī dirokenēdin.

⁴⁷ Anī nigin, pris odudug Farisia tamo geid, katō difouf nigin Juda uyu irouya neid kaunsel guru fiya diwegin.

Idi diron, “Ada naig tafouf? Ere nigin, tamo enei memelik musei inodif.

⁴⁸ Ada lo tafe di, ī enei eig fef ilauf are, tamo ganan ī nigin momoi douf, age dife di, neda ibodōyā ado teneub, Rom tamom disi dalouf.”

⁴⁹ Age de di, idi atun taka, yana Kaiafas, ī yar anī bun pris neid mudur ibod ken, wogō yen, “Ā ereb taka keleī sā!

⁵⁰ Tamо kayau ganan inanakalauf ban, tamo tekeleim tamo kayau nigin laa fouf, are ā nigin deuf anī, ā to kisi gef.”

⁵¹ Ī yogon kisi bunem od enei to iron, anī ere, ī yar anī bun pris neid mudur ibodon nigin, profet od wogō yen, Jesus Juda tamo kayau ganan nigin laa fouf yen.

⁵² Are Juda tamo kayau nigin dogol sā, Negur gere tar firagagaū difen anidig, guri feid irousi kuru fedi di, idi tekelei youf nigin, Jesus laa fouf yen.

⁵³ Anī nigin, naa anī bunem ilen, idi Jesus dukesiyouf nigin naab dimiren.

⁵⁴ Age dife di, Jesus ī, Juda tamo kayau meleid bun mala yaor to iyon, ī an iminkele fen, teneub akor taka, gerere tuan melsā, fonō yana Efraim ilen, an yogon dō fiya tar geid dibodon.

55 Sain anī Juda neid Pasa naa melsā, musei fonō fonō temeleid, dogo neid nonorou lilik fiya nigin, Pasa naa wōya sā mog, Jerusalem diselen.

56 Idi Jesus nigin meleid dinof diyon. Idi tempel modoū bun difar fen, abob to difen, “Ā ere kisi gef? Ī Sifa bun to isiyouf de?”

57 Anī ere, pris odudug Farisia tamo geid, taka nem Jesus nain be ibodok ya anī ile fen, irokenēdi di, dirounēf nigin wedereid diroun.

12

*Betani Oun Jesus Ye Bun Maria Moul Fi Felen
(Matyu 26:6-13; Mak 14:3-9)*

1 Pasa nē naa wōya nigin, naa sigis fau ibod mog, Jesus Betani wō yen, an Lasarus ibodon, ī Jesusem laa bun tamal turī fiyen.

2 An Jesus nigin waud el fe fen, bō saaf dabin, anī Marta aruna yalen. Idi Jesus geid tebol bun dibodon atun, Lasarus ibodon.

3 Age de mog, Maria moul sumeī biya, hap lita nad nem dinon, are moni odug nē anī yale fen, Jesus ye bun fi fel fen, fatiyam ye waī fen. Age fe di, moul sumeī biyam, fō anī ino yalen.

4 Anī ere, Judas Iskariot, in dō fiya taka, fau dum im Jesus kiwai imeid bun inouf, im iron,

5 “Ere nigin moul sumeī biya enei, na nigin sur fe fen, moni anī maleg tamo to ifenēdiyam? Are yar tekelei bun, kabī tamo nē mala yaledig kilei.”

6 Ī maleg tamo nigin kisif fen, enei to iron, ī yogo bē tamo nigin age yen. Ī moni nē kodol lo fiya tamo, moni nē kodol bun dinodig are bē yaledig.

⁷ Anĩ nigin, Jesus iron, “Kayau are utornẽg, ĩ aya mū difiyauf naa nẽ nigin, moul sumeĩ biya enei irouwauf.

⁸ Maleg idi, ā geid sain faimud ubodõgouf, anĩ ere, aya, ā geid sain faimud to tabodõf.”

⁹ Age de mog, Juda tamo kayau musei, Jesus an ibodok ya kelei ken, disin, are ĩ nigin dogol sã, Lazarus Jesusem laa bun tamal turĩ fiyen ĩg dilouf nigin.

¹⁰ Anĩ nigin, pris odudug Lazarus ĩg dukesiyouf nigin naab dimiren,

¹¹ ere nigin, Lazarus bunem, Juda tamo kayau musei Jesus garan dile fen, ĩ nigin momoi den.

Jesus Tamo Yana Ado Gen Jerusalem Ilen

(Matyu 21:1-11; Mak 11:1-11; Luk 19:28-40)

¹² Naa anĩ ile di, tamo kayau musei Sifa bun disin, Jesus Jerusalem isif ya anĩ karĩ den.

¹³ Idi pam aarau anã aarau gen anĩ guri de, Jesus tarabã difiyẽf nigin dile fen, diweig diron, “Hosiana!**”

“Odug yana bunem isif, ĩ el fiya ado!”[†]

“Israel neid King, ĩ el fiya ado!”

¹⁴ Jesus donki naal fotou fe fen, teten ibodon, are Negur nẽ Itotoya eig ye irok kilei,

¹⁵ “To kumĩg, Saion nẽ tamo kayau, uleg, āgenei king,

donki naal teten ibod ken, isif.”[‡]

¹⁶ Uruwa bagai, in dõ fiya tar, enei ganan nigin wedereid fokõya san. Dum Negur Jesus fula fiya

* **12:13:** Anĩ nẽ gariya, ‘Usennamã!’ Od anĩ tamo kayau Negur yana yaleseya nigin wogõ dedig. † **12:13:** Sam 118:25, 26

‡ **12:15:** Sekaraia 9:9

medeīya ifenē di, enei ī nigin ditoton ado, enei tamo kayau ī bun age difen anī, wedereid fokō yen.

¹⁷ Tamo kayau Jesus geid difar fen, ī Lasarus matmat bun tamal iweigne ken, laa bun tamal turī fe di, lo difen idim wogagā def, dile di, od iyokelen.

¹⁸ Tamo kayau musei, Jesus memelik anī inon karī den nigin, ī fotou difiyēf nigin dilen.

¹⁹ Age dife di, Farisia tamo idi abob dirokenen, “Ulegef, ada kabī ege talegef. Lo gouf are, tamo kayau ganan ī dō difiyek!”

Jesus Yogan Laa Nigin Iron

²⁰ Sifa bun Negur yana dalesauf nigin diselen idi atun, Grik tunī difaren.

²¹ Idi Filip Betsaida tamal Galili teneub bun, ī garan disi fen, to difiyē diron, “Tamo biya, amā Jesus mailau fenē.”

²² Age de di, Filip ile, Endru iroken ken, uruwom Jesus dirokenen.

²³ Jesus idi irokenēdin, “Negur Tamо Naal fula fiya medeīya ifenē nigin, sain anī mogo yeir isil.

²⁴ Aya ā momoi bagai arokeneik, wit faat taka teneub bun kubū ye fen, to burauf are, faat tekelei dogol agef ibodōf, anī ere, ī burauf are, faat musei wowā douf.

²⁵ Tamо ī yogan mata nigin wau laafef are, ī mata anī itornēf, anī ere, tamo ī teneub enei bun, yogan mata atorok bagai ye fen, itorok are, ī irounek ile, mata ibodkeleya bun ilauf.

26 Taka ī aya arunau yalef, ī aya dō fiyauf bagai. Aya abodok nē an, neu kabī tamo īg an ibodōf. Taka ī arunau yalef, neu Dei ī yana yalesauf.

27 “Gama neu wau morok, anī aya ere auf? ‘Dei sain enei bun usenna,’ auf de? Sā, gariya enei nigin bagai, sain enei bun asin.

28 Dei ogo yanā selī kulō!”

Age ye di, ait taka saa ilunem isin, “Aya mogo anī selu abin, aya baban anī selu abiyouf.”

29 Tamо kayau an difaren anī karī de fen, diron, kolimei den, tunī diron, engel takam wogō fiyem.

30 Jesus iron, “Ait enei, ā isenneī di, momoi gouf nigin, aya nigin sā.

31 Gama Negur ī, teneub enei nē tamo kayau es fedif, gama teneub enei nē mudur iruwauf.

32 Anī ere, aya tenebur tamal dalesnauf sain, aya tamo ganan aya bun, didī afediyouf.”

33 Jesus yogo naig fe, laa fouf anī ifelnēdiyouf nigin, od enei wogō yen.

34 Tamо kayau aiten dale diron, “Lo bun amā Kristus gai gai ibodōf ya anī karī maun, naig fe di, ō urok, ‘Tamo Naal ī dalesnēf bagai?’ Ai anī Tamо Naal?”

35 Age de di, Jesus idi irokenēdin, “Sain naal bagai ā lalan adouf. Ā lalan ado mog, uyōg, anī bunem gugum to irousí kerū yeif. Tamо ī gugum bun iyok, ī naib ilef are keleī sā.

36 Ā lalan ado mog, āgenei momooya lalan bun unog, ago gouf, ā lalan gere tar wowā gouf.” Jesus od enei wogō yel fen, ī itorneīd ile, iminkelen.

Juda Tamо Kayau Jesus Nigin Fau To Momoi Den

37 Jesus idi meleid bun memelik musei inodin, anī ere, idi fau ī nigin to momoi den.

38 Enei are profet Asaia nē od kisi falauf nigin wō yen:

“Odug, aim nemā od nigin momoi yen?
Aiyai bun Odug nē megeir yaor fen?”

39 Gariya enei nigin, idi momoiya kisi feleya sā, ere nigin, Asaia baban od enei iron:

40 “Negur idi meleid ifofa ken,
waud ifofakelen,
anī bunem, idi meledim ileya kisi feleya sā,
waud fokōya kisi feleya sā,
waud faleiya kisi feleya sā, age fiya sam, aya
el afedim.”§

41 Asaia od enei iron, ere nigin, ī Jesus nē fula fiya medeīya ile fen, ī nigin iron.

42 Mudur adodo idi atun, museig ī nigin momoi den. Anī ere, Farisia tamo idim Juda neid uub fō bun dirudidiya nigin kumī de fen, dogo neid momooya to yaor difen.

43 Ere nigin, idi Negurem yeneid yaleseya ban, tamom yeneid dalesauf anī orodidig.

44 Jesus iweig iron, “Tamo ī aya nigin momoi yef, ī aya nigin dogol to momoi yef, ī aya sur fiyan nigineg momoi yef.

45 ī aya lo fiyaf, im aya sur fiyan anī ilef.

46 Aya lalan anī, tenebur ein asin, are taka ī aya nigin momoi yef, ī gugum bun to ibodōf nigin age afen.

47 “Taka ī neu od karī ye fen, to dōfef, aya ī to es afiyek, ere nigin, aya tamo kayau es fiya nigin to asin, aya kel gei fiya nigin asin.

48 Taka ī aya itorna fen, neu od to irouf, ī nigin es fiya tamo ibodok. Od de wogō aun anim, idikeleya naa bun ī es fiyēf.

49 Ere nigin, aya neu kisi nem to wogō aun, anī ere, Dei aya sur fiyan im, ere anī wogō auf, naig afe wogō auf anī, toli fiya di, wogō aun.

50 Aya keleī, yogon si fiya are mata faimud ibodkeleya bun ileya nē, anī nigin, ereb aya wogō auf, Dei aya wogō auf nigin irokanan kilei bagai, aya wogō auf.”

13

Jesus In Dō Fiya Tar Yeid Kulo Fedin

1 Pasa nē Sifa fau wōya sā mog, Jesus kelein, ī teneub enei itor ken, Tama garan ileya nē sain mogo wō yel. ī yogon tamo tar tenebur ein dibodok anidi nigin wau laa fedig, ī idi nigin wau laa fen are iroule idikeleya bun.

2 Bō saaf dō mog, Satanem Judas Iskariot, Simon naal namen Jesus kiwai imeid bun ifenēf nigin, kisi mogo ifenen.

3 Tama ī ereb ereb ganan, Jesus ima bun inon, ī Negur bunem isin anī, Negur bun kel ilef, are Jesus ī keleī.

4 Jesus saaf bun ibodon anī fā ye, yogon kolos teten inukeis fen, taul yale, luwa gu fen.

5 Age fel fen, ī naan yale, beī bun yu ken, yogon dō fiya tar yeid kulo fiya gariya inon, agef fen, taul luwa gu fen anim yeid waī fedin.

⁶ Jesus Simon Pita garan isi di, ĩ Jesus irokenen, “Odug, õ aya yeu kulo wou fenē de?”

⁷ Jesus Pita aiten yale irokenen, “Ereb aya age afef, õ gama keleĩ sã, anĩ ere, fau dum õ keleĩ youf.”

⁸ Pita iron, “Aya yeu to bagai kulo wouf.”

Jesus Pita irokenen, “Aya õ to kulo ayõf are, õ aya ado nigal fiya sã.”

⁹ Simon Pita Jesus irokenen, “Odug, agouf are, yeu dogol sã, imau mudurou adog kulo wouf.”

¹⁰ Jesus aiten yale iron, “Taka ĩ naan igukelel, ye dogol kulo fouf, bouwa ganan filiya. Ā filiya ba, anĩ ere, ā ganan sã.”

¹¹ Jesus ĩ aibem kiwai ifenẽf anĩ keleĩ, anĩ nigin, ganan filiya sã yen.

¹² Jesus yeid kulof bure fel fen, yagon kolos ifounkel, yagon modoũ bun kelen. Agef fen, ĩ idi to fedin, “Aya ereb ā bun age afel anĩ, ā wedereĩ fokō yef de?

¹³ Ā aya ‘Tise’ ado ‘Odug’ gedig, are tutuk, ere nigin, aya de anĩ.

¹⁴ Aya āgenei Tise ado Odug, ā yeĩ kulo afel, anĩ nigin, āg abob ye kulo gouf.

¹⁵ Aya malakanon anokeneim, are ā nigin age afel gen, āg ago gouf.

¹⁶ Aya ā momoi bagai arokeneik, ferfer takam yagon odug to wal fiyẽdig, arū tamom ĩ sur fiyen to wal fiyẽdig.

¹⁷ Gama ā enei keleĩ, anĩ nigin, enei dōg ago gouf are, ā el yeĩf.

*Jesus Ī Kiwai Imeid Bun Inenēf Nigin Iron
(Matyu 26:20-25; Mak 14:17-21; Luk 22:21-23)*

18 “Aya ã ganan nigin to wogō auf. Aya agirnēdin idi, aya keleī, anī ere, enei are Negur nē Itotoya bun yenek anī kisi falauf nigin, ‘Taka ī aya urom neu bret moko, ī aya kiwai ifana fen, dā fiyal.’*

19 “Anī fau to wō ye mog, gama aya ã arokeneik, anī bunem, anī wō youf sain bun, aya de Im ya anī momoi gouf.

20 Aya ã momoi bagai arokeneik, taka ayam sur afe di, ī yalef are, ī aya yaleyaf, taka ī aya yaleyaf are, ī aya sur fiyan anī yalef.”

*Jesus Judasem Kiwai Ifenēf Yen
(Matyu 26:20-25; Mak 14:17-21; Luk 22:21-23)*

21 Jesus od enei wogō yel fen, ī wau moro ken, kurō feis iron, “Aya ã momoi bagai arokeneik, āgenei takam aya kiwai ifanauf.”

22 Yogan dō fiya tar idi abob loli difen, ai nigin bagai wogō yef de fen, nene den.

23 Idi neid taka, dō fiya taka Jesus ī nigin wau laa fedig ī, Jesus sirin ibodon.

24 Simon Pita, dō fiya tamo enei mudurem fiye ken, ī iron, “Ī ai nigin irok anī to wiye.”

25 Dō fiya tamo anī, Jesus akoron mudur isen ken, to fen, “Odug, ō ai wof?”

26 Jesus aiten yale iron, “Tamo bret enei beī bun nu afe fen, afenēf anī.” Age ye fen, ī bret nuf fen, Judas Iskariot, Simon naal ifenen

27 Judas bret anī yale di, Satan ī namen ilen.

* **13:18:** Sam 41:9

Jesus Judas irokenen, “Ereb agou fenē, kaisā bagai ago.”

²⁸ Anī ere, saaf bun dibodon anī takam, ere nigin Jesus od enei Judas irokenen anī, kisi to fokō yen.

²⁹ Judas ī moni lo fiya tamo nigin, tunī kisi difen, Sifa nē ereb ereb na yalouf nigin be, maleg ereb ereb ifenēdiya nigin be, Jesusem Judas irokenē di, ilef den.

³⁰ Judas ī bret yale fen, kaisā bagai oreis ilen. Sain anī bō.

Pita Nē Wa Fiya Nigin Jesus Iron

(*Matyu 26:31-35; Mak 14:27-31; Luk 22:31-34*)

³¹ Judas iya ile di, Jesus iron, “Gama Tamō Naal fula fiya medeīya yale di, Negur fula fiya medeīya Tamō Naal bun yalef.

³² Negur fula fiya medeīya Naal bun yalef are, Negur ī fula fiya medeīya Yogo bun Naal ifenēf, fula fiya medeīya anī kaisā bagai Naal ifenēf.

³³ “Neu kesu tar, aya ā geid sain naal bagai tabodōf. Ā aya umirnagauf. Aya Juda tamō arokenēdin kilei, gama ā arokeneik, aya elef nē an, ā isiya kisi feleya sā.

³⁴ “Aya ītāfiya mata afeneik, abob nigin wauī laa fouf. Aya ā nigin wau laa fedig kilei, āg abob nigin wauī laa fouf bagai.

³⁵ Ā abob nigin wauī laa fouf, anī bunem tamō ganan idi keleī youf, ā neu dō fiya tamō tar.”

³⁶ Simon Pita Jesus to fiyen, “Odug, ō nai ulef?”

Jesus iron, “Aya elef nē an, ō gama aya dō fiyaya kisi feleya sā, anī ere, ō fau dum dō wouf.”

³⁷ Pita to fen, “Odug, ere nigin gama aya õ dō yōya kisi feleya sā? Aya õ nigin neu mata atorōf.”

³⁸ Age ye di, Jesus iron, “Ô aya nigin ogon mata utorōf de? Aya õ momoi bagai arokonok, tataro fau kokorok yeya sā mog, õ aya nigin wa wo, towo wouf!

14

Jesus In Dō Fiya Tar Neid Waud Wā Fen

¹ “Ã wauī to morō yeī. Negur nigin momoi gouf, aya nigineg momoi gouf.

² Neu Dei nē fō bun aab musei ado, age fiya sam are, arokeneim. Aya eselef nē an, āgenei modoū dodok afouf.

³ Aya esel, āgenei modoū dodok afel fen, aya ā geid tabodōf nigin, aya kelau gei ayeīf, are āg aya abodok nē an ubodōgouf nigin.

⁴ Aya eselef nē naab anī, ā keleī.”

Negur Bun Ileya Naab, Jesus

⁵ Tomas Jesus irokenen, “Odug, õ narib ulef are, amā keleī sā, anī nigin, naig mafe fen, amā naab anī keleī youf?”

⁶ Jesus Tomas irokenen, “Aya dogol naab anī, aya dogol momoi anī, aya dogol mata anī. Taka ī naab taka bunem, Dei wagen to isiyouf, aya bunem dogol.

⁷ Ā aya keleim are, ā neu Deig keleim. Gama sain enei bun ilauf, ā ī keleī, ī ulegel.”

⁸ Filip iron, “Odug, Tamada ufelnamā, anī amā nigin deuf.”

⁹ Jesus iron, “Filip, aya ā geid sain meluk tabodon, anī ere, õ aya keleī sā de? Taka ī aya

ileyan are Dei ilen. Naig fe di, õ urok, ‘Tamada ufelnamã’?

¹⁰ Aya Dei bun abodok, Dei aya bun ibodok anĩ to momoi wof de? Od aya wogõ ayeik are, aya yug bun tamal sã, are Dei aya bun ibodok ĩ kabĩ yalef.

¹¹ Aya Dei bun abodok, Dei ĩ aya bun ibodok anĩ, momoi wiyagauf, sãf are, aya kabĩ aledig bun, momoi wiyagauf.

¹² Aya ã momoi bagai arokeneik, taka ĩ aya nigin momoi yef, ereb aya age afedig, ĩg age fouf, enei age afedig anĩ wal fiyag age fouf, ere nigin, aya Dei gein eselef.

¹³ Ā ereb taka nigin, aya yanau nem to gouf, aya age afouf, anĩ bunem, Dei ĩ Naal bun, fula fiya medeīya yalouf.

¹⁴ Ereb taka nigin, aya yanau nem to wiyagauf are, aya age afouf.

Jesus Awa Uur Fateul Sur Afouf Yen

¹⁵ “Ā aya nigin wauĩ laa fouf are, neu ĩtāfiyã anĩ dō gouf.

¹⁶ Aya Dei arokenẽ di, ĩ Isenneīya taka, ã geid gai gai ibodōf nigin ifeneif,

¹⁷ are momoi nẽ Awa Uur. Tenebur ein tamo kayau ĩ to dalouf, ere nigin, idi ĩ to dilef, to keleī. Anĩ ere, ã ĩ keleī, ere nigin, ĩ ã geid ibodok, ã bun ibodōf.

¹⁸ Aya ã madmad gen to atorneif. Aya ã gein asiyouf.

¹⁹ Sain naal bagai ile di, tenebur ein tamo kayau, aya to dileyauf, anĩ ere, ã uleyagauf. Aya mata abodok nigin, ãg mata ubodōgouf.

20 Naa anī bun, aya neu Dei bun abodok, ã aya bun ubodōgef, aya ã bun abodok anī, ã keleī youf.

21 Taka ī neu ītāfiya irou dōfef, ī aya nigin wau laa fedig. ī aya nigin wau laa fedig anī, neu Dei ī nigin wau laa fouf, ayag ī nigin wau laaf fen, aya yug ī bun yaor afouf.”

22 Age ye di, Judas taka (Judas Iskariot anī sā) iron, “Odug, ere nigin õ ogo, amā bun dogol õ yaorōf, tenebur ein tamo kayau bun sā?”

23 Jesus iron, “Taka ī aya nigin wau laa gef, ī neu od dō fouf. Neu Dei ī nigin wau laa fouf, anī amā ī gein masi, weim mabodōf.

24 Taka ī aya nigin to wau laa gef, ī neu od to dō fouf. Od enei ã karī gef, are aya bun tamal sā, are Dei aya sur fiyan nē od.

25 “Aya fau ã geid tabod ken, od enei ganan wogō ayein.

26 Anī ere, Isenneīya, Awa Uur Fateul anī, Deim aya yanau nem sur fouf, Awa Uur Fateul ī, ereb ereb ganan ifelnei ken, aya arokenein anī ganan wedereī fokōf fen, kisi turī fouf.

27 Wau inosiya atorkeneik, neu wau inosiya afeneik, aya afeneik are, tenebur ein tamo kayau wau inosiya difeneik gen sā. Ñ wauī to morō yei ken, kumīg.

28 “Aya eig au di, karī gel, ‘Aya ele fen, ã gein kelau asiyouf.’ Ñ aya nigin wauī laa fem are, aya Dei bun elef anī nigin, ã kulīya adom, ere nigin, Dei ī aya wal fiyaya.

29 Anī wōya sā mog, aya mogo arokeneim, anī bunem, agef wō ye di, ã momoi gouf.

³⁰ Aya ã geid, sain meluk to wogõ tauf, ere nigin, teneub enei nẽ mudur mogo isif. Anĩ ere, ï aya lai fiyaya nigin megeir sã,

³¹ anĩ ere, tenebur ein tamo kayau keleĩ bagai youf, are aya Dei nigin wau laafef, anĩ nigin, neu Dei irokanan kilei bagai age afedig.

“Fafäg fen, modoũ enei tatorõg.

15

Aa Wain Gariya Ado Yogan Were

¹ “Aya aa wain bagai, neu Dei ï kabĩ marau.

² Were aya bun biya to yuk anĩ ganan, Deim kokour falauf, were biya yuk anĩ ganan, Deim dẽ fe di, biya musei imauf.

³ Aya od wogõ ayein anim, ã amuyẽ sã, ã mogo filiya.

⁴ Ñ aya bun ubodõgouf, ayag ã bun abodõf. Were taka aa wain luwa ado to susu falauf are, yogo biya yüya kisi feleya sã. Age fiya bagai, ãg aya bun to ubodõgouf are, biya yüya kisi feleya sã.

⁵ “Aya aa wain gariya, ã were. Taka ï aya bun ibodõ di, ayag ï bun abodõf are, ï biya musei imauf. Aya utornagauf are, ã ereb taka to ago gouf.

⁶ Taka ï aya bun to ibodõf are, ï were diraile di, meti ledig gen. Were age fediya are gei de fen, yã dirarã di, isasaikelediyouf.

⁷ Ñ aya bun ubodõge di, neu od ã bun ibodõf are, ereb taka oroyei ken, urokanage di, ifeneif.

⁸ Biya musei üg fen, neu dõ fiya tar wowã gouf are, neu Dei ï fula fiya medeÿa yalouf.

⁹ “Neu Dei aya nigin wau laa fedig kilei, ayag ã nigin wau laa fedig. Gama ã neu wau laa fiya anĩ bun ubodõg.

¹⁰ Aya neu Dei nẽ ïtãfiya dõ afe fen, yogon wau laa fiya bun abodok kilei, ã neu ïtãfiya dõ gouf are, neu wau laa fiya bun ubodõgouf.

¹¹ Aya enei arokeneim, are neu kulïya ã namein ibod ken, ãgenei kulïya barikãf nigin.

¹² Neu ïtãfiya are yeir, aya ã nigin wau laa fedig gen, ãg abob nigin wauñ laa fouf.

¹³ Wau laa fiya enei wau laa fiya ganan wal fiya, are yogon mou tar nigin yogon mata itorok anĩ.

¹⁴ Ïaya ereb ïtãfiya arokenein anĩ dõg, ago gouf are, ã neu mou tar.

¹⁵ Aya baban ã to ferfer ayeif, ere nigin, ferfer ï yogon tamo odug nẽ kabï keleï sã. Anĩ ere, aya ã neu mou tar ayeim, ere nigin, ereb ereb ganan aya Dei bun karï aun anĩ, aya ã afelneim.

¹⁶ Ïgem aya to ugirnagen, aya ã agirnei ken, uleg, biya ūg fen, biya anĩ ibodkalauf nigin ã ayein. Agog fen, aya yanau nem, ereb tako nigin Dei urokenëge di, ifeneif.

¹⁷ Enei anĩ neu ïtãfiya, abob nigin wauñ laa fouf.

Tenebur Tamò Kayau, Dõ Fiya Tamò Tar Nigin Kiwi Difenëdiyouf

¹⁸ “Tenebur tamo kiwai difeneif are, aya ketem kiwai difanan anĩ, ã keleï youf.

¹⁹ Ï teneub enei nẽf are, ã yogon nigin, ã nigin wau laa fouf. Anĩ ere, ã teneub enei nẽ sã, aya ã tenebur tamal gei ayei ken, agirnein. Anĩ nigin, tenebur ein ã kiwai difeneik.

²⁰ Aya od arokenein anī, ā karī walagauf, ‘Ferfer taka yogan odug to wal fedig.’* Idi aya darau difanan are, āg age de darau difeneif. Idi neu od dō difen are, idi āgeneig age de dō difouf.

²¹ Idi enei ganan ā bun age difouf, ere nigin, aya yanau ā ado, are aya sur fiyan idi ī keleī sā nigin.

²² Aya to asi fen, arokenēdim are, idi mosor sam. Anī ere, idi neid mosor nigin to galā dūf.

²³ Taka ī aya kiwai ifanaf, ī neu Deig kiwai ifenek.

²⁴ Taka nem to age fen anī, aya idi atun to age afem are, idi mosor sam. Anī ere, gama idi memelik dile fen, aya neu Dei ado kiwai difanaman.

²⁵ Anī ere, enei, idi neid Lo bun ditoton yenek anī, kisi falauf nigin, ‘Idi aya mura sā kiwai difanan.’†

²⁶ “Awa Uur Isenneīya are, ayam Dei bun tamal ā bun sur afe di, isiyouf, are momoi nē Awa Uur, Dei bun tamal ulō yeis isi fen, ī aya nigin kurō fesiyouf.

²⁷ Āg agog kurō wesigouf bagai, ere nigin, ā aya geid fen, gariya bunem tasin.

16

¹ “Ā to felu rogouf nigin, od enei ganan mogo ā wogō ayeim.

² Idi ā Juda neid uub fō bun diruyeif. Takag, sain fau isiyouf bun, taka ī ā ideneīkeis fen, kisi fouf, Negur sesewi afiyek youf.

* **15:20:** Jon 13:16 † **15:25:** Sam 35:19; 69:4

³ Idi enei age difouf, ere nigin, idi Dei keleī sā, aya nigineg keleī sā.

⁴ Aya enei mogo arokeneim, are sain isiyouf bun, ã wedereī aroul anī, karī walagauf nigin. Aya enei tetun to arokenein, ere nigin, aya ã geiden.

Awa Uur Fateul Nē Kabī

⁵ “Gama aya ī sur fiyan gein eselef, anī ere, ã takam to aya to fiyaf, ‘Ó nai ulef?’

⁶ Aya enei arokeneim nigin, ã fatuk bagai wauī gudū fef.

⁷ Anī ere, aya momoi arokeneik, aya āgeneī biya fiya nigin eselef. Aya to eselauf are, Isenneīya anī ã bun to isiyouf, aya eselauf are, aya ī, ã bun sur afouf.

⁸ Sain ī isiyouf, tenebur ein tamo kayau bun, mosor nigin, Negur nē madur fiya nigin ado, Negur nē es fiya nigin, idi neid kū fenēya anī yaor fe, faded fediyouf.

⁹ Mosor are, idi aya nigin to momoi def nigin.

¹⁰ Negur nē madur fiya are, aya Dei gein eselei di, ã aya to uleyagauf nigin.

¹¹ Negur nē es fiya are, teneub enei nē mudur mogo es fiyen nigin.

¹² “Aya ã irokeneīya nigin musei biya, anī ere, ã gama keleīya kisi feleya sā.

¹³ Anī ere, sain momoi nē Awa Uur isiyouf bun, momoi nē anī ganan bun, im itoneīf. ī yogon kisim to wogō youf, ereb ī karī yef anī wogō youf, agef fen, ereb fau wō youf anī irokeneīf.

¹⁴ ī neu bun tamal yale fen, ã ifelneīf, anī bunem, aya fula fiya medeīya ifanauf.

15 Dei nẽ ganan are neu, anĩ nigin, aya arom, Awa Uur neu bun tamal yale fen, ã ifelneif aul.

16 “Sain naal bagai ile di, ã to uleyagauf, agef fen, baban sain naal bagai ile di, aya uleyagauf.”

In Dõ Fiya Tar Waud Gudū Fef Are Fau Kulī Douf

17 In dõ fiya tar tunĩ abob dirokenen, “Ere gariya nigin eig ye irok, ‘Sain naal bagai ile di, ã to uleyagauf, agef fen, baban sain naal bagai ile di, aya uleyagauf,’ takag, ‘Ere nigin, aya Dei gein eselef nigin,’ yef?”

18 Idi anĩ fau fau wogõ den, “Ĩ ere ye fen, ‘sain naal bagai’ yen? ĩ irok anĩ, amã gariya keleĩ sã.”

19 Idi enei nigin Jesus to difou fenẽ mog, Jesus anĩ ile fen, idi irokenëdin, “Aya eig aul anĩ nẽ gariya nigin abob to wiyëgef de, ‘Sain naal bagai ile di, ã to uleyagauf, agef fen, baban sain naal bagai ile di, aya uleyagauf?’

20 Aya ã momoi bagai arokeneik, ã fau maruĩ isi fen, wauĩ gudū fouf, tenebur tamo kayau kulī de mog. ã wauĩ gudū fouf, anĩ ere, ãgenei wauĩ gudū fiya falei yel kulī youf.

21 Kayau kesu ibodõ fenẽ daraufef, ere nigin, yagon naa wõ yel, anĩ ere, yagon kesu wõ ye di, darau weder tu kelef, ere nigin, kesu tenebur wõ yel nigin kulī yef.

22 Āg age fiya, gama ãgenei wauĩ gudū fiya nẽ naa, anĩ ere, aya baban ailiyei di, ã kulī gouf, takanem ãgenei kuliyā to yalelkeneif.

23 Naa anĩ bun, ereb takanigin ã to, to wiyagauf. Aya ã momoi bagai arokeneik, aya yanau bunem, ereb takanigin neu Dei to wiyëgouf are, ifeneif.

²⁴ Uruwa bunem isi gama, aya yanau nem, ereb taka nigin to, to gen. To gouf, walogouf, ago gouf, ã kulîya barikâf.

²⁵ “Aya yaab od wogõ audig, anĩ naa taka isiyouf bun, aya yaab od to wogõ auf, anĩ ere, neu Dei nigin yaor arokeneif.

²⁶ Naa anĩ bun, aya yanau bunem to gouf. Aya ã nigin Dei to afiyef ya anĩ to arokeneik,

²⁷ ere nigin, ã aya nigin wauĩ laaf fen, aya Negur bun tamal asin anĩ, momoi gedig nigin, Dei ã nigin wau laa fedig.

²⁸ Aya Dei bun tamal ulõ aus fen, tenebur asin, gama aya teneub enei ator ken, Dei bun kelauf.”

²⁹ Age ye di, Jesus nẽ dõ fiya tar diron, “Gama õ yaor wogõ wof, yaab od nem sã.

³⁰ Gama amã mailef, õ ereb ereb ganan keleï, are taka nem to yõf anïg to tari wodig. Anĩ bunem, õ Negur bun tamal usin anĩ, momoi mauf.”

³¹ Jesus aitedin yale iron, “Ã gama momoi gef de?

³² Anĩ ere, naa fau isif, are mogo isil, anĩ bun, ã firagagaũ yeï, ãgenei fonõ fonõ yeïf. ã aya mugu utornagauf. Anĩ ere, aya mugu sã, ere nigin, neu Dei ï aya ado.

³³ “Ã aya bun wauĩ inosiya adouf nigin, od enei arokeneim. Tenebur ein ã morõ adouf, anĩ ere, totol ado ufaragauf! Aya teneub enei nẽ megeir mogo wal afen.”

¹ Jesus od enei wogō yel fen, saa ilun itad fen, kosē yen:

“Dei, naa mogo isil, fula fiya medeīya õ Naal wenē, ago di, õ Naal õ selī kulō fouf.

² Are õ Naal, idi ganan õ wenen bun, mata faimud ibodkeleya ifenēdiyouf nigin, tamo kayau ganan lo fediya nē megeir õ wenen.

³ Mata faimud ibodkeleya are yeir, õ momoi Negur tekelei ado Jesus Kristus õ sur won anī, idi keleī youf anī.

⁴ Kabī õ wanān anī adikelen bunem, tenebur ein aya õ bun fula fiya medeīya arou asin.

⁵ Dei, teneub kare fiya sā mog, ada urom fula fiya medeīya adon anī, õ malā bun fula fiya medeīya anī gama wana.

Jesus In Dō Fiya Tar Nigin Kosē Yen

⁶ “Aya teneub enei bun tamal õ wanān idi bun, õ yaor ayon. Idi ogon, anī ere, õ idi wanān, ago di, idi ogon od dō difedig.

⁷ Gama idi keleī, ereb ereb ganan aya wanān are õ bun tamal.

⁸ Aya od wanān anī afenēdi di, idi dalen. Aya õ bun tamal asin anī, idi momoi bagai kelein, idi onom aya sur wiyan anī momoi den.

⁹ Aya idi nigin kosē auf. Aya teneub enei nē tamo kayau nigin to kosē auf, anī ere, idi õ wanān anidi nigin kosē auf, ere nigin, idi ogon.

¹⁰ Neu ganan are ogon, ogon are neu. Idi bunem, aya fula fiya medeīya alel.

¹¹ Aya tenebur ein to abodōf, anī ere, idi fau tenebur dibodok, aya õ gein esef. Dei Fateul, õ

yanā wanān nē megeir bunem, kulatun wediyouf, anī bunem, ada tekelei gen idig tekelei youf.

12 Sain aya idi geid mabodon, õ aya yanā wanān anī bunem, kulatun afeid el afen. Taka to fō yelen, tamo ī fō yalauf nē dogol fō yelen, are Negur nē Itotoya kisi falauf nigin.

13 “Gama aya õ gein esef, neu kulīya idi namedin barikāf nigin, tenebur ein fau abod ken, od enei arok.

14 Aya ogon od afenēdi di, teneub enei nē tamo kayau idi kiwai difenēdin, ere nigin, gama aya teneub enei nē sā, age fiya gen, idig teneub enei nē sā.

15 Aya teneub enei bun tamal walelnēdiyouf nigin to kosē auf, anī ere, wadāgen tamo sane isi fen, daū fediya nigin, kulatun wediyouf anī kosē auf.

16 Aya teneub enei nē sā, age fiya gen, idig teneub enei nē sā.

17 Momoi bunem fateul unenēdiyouf, ogon od are momoi.

18 Õ teneubur ein sur wiyan gen, ayag teneub enei bun sur afiyēdin.

19 Idi nigin, aya yug adok bagai afonok, are idig momoi bagai dogo adok Negur difenēf nigin.

Jesus Momoiya Tamo Kayau Ganan Nigin Kosē Yen

20 “Aya neu kosēya are idi nigin dogol sā, idi neid od bunem, aya nigin momoi douf anidi nigin, aya kosē auf,

21 idi ganan tekelei youf nigin kosē auf, Dei õ aya bun ubodok, aya õ bun abodok gen, idig ada

bun dibodō di, teneub enei nē tamo kayau, onom aya sur wiyan anī, momoi douf nigin.

22 Fula fiya medeīya õ wanān anī, idi afenēdin, are ada tekelei gen, idig tekelei youf nigin.

23 Aya idi bun, õ aya bun, are idi tekelei youf nigin, anī bunem, onom aya sur wiya fen, aya nigin waū laa fedig gen, idi nigin neg waū laa fedig anī, teneub enei nē tamo kayau keleī youf.

24 “Dei, idi õ aya wanān anidi, aya abodok nē an, aya geid mabodōf anī orouf, are idi neu fula fiya medeīya dilouf nigin, fula fiya medeīya anī teneub kare fiya sā mog, õ aya nigin waū laaf fen, wanān anī.

25 “Dei madur bagai, teneub enei nē tamo kayau idi õ keleī sā, anī ere, aya õ keleī, neu dō fiya tar idi, onom aya sur wiyan anī keleī.

26 Aya õ anī afelnēdi di, idi õ keleī, õ nigin fau fau afelnēdif alauf, are õ aya nigin waū laa fiya anī, idi bun ibodōf ado, ayag idi bun abodōf nigin.”

18

Jesus Dirounen

(Matyu 26:47-56; Mak 14:43-50; Luk 22:47-53)

1 Jesus od enei wogō yel fen, ī yogon dō fiya tar geid, Kidron naan uus atu dilen. Kidron sitakā kabī takā ibodon, ī yogon dō fiya tar geid, kabī atu dilen.

2 Kiwai tamo Judas ī modoū anī keleī, ere nigin, sain musei Jesus in dō fiya tar geid an guru difedig.

³ Anī nigin, Judas, kusī tamo tunī ado, tempel lo fiya tamo tunī pris mudur adodo Farisia tamo geid idim sur difedin anidi geif fen, kabier uyu ile di, dilen. Idi yal, lam, kusī nē waila guri de fen, dilen.

⁴ Jesus, ī bun wō youf anī ganan kelein, ī iyok ile to fedin, “Ā ai umirnēgef?”

⁵ Idi diron, “Jesus Nasaret tamal.”

Jesus iron, “Aya im.” Kiwai tamo Judas, idi geid an difaren.

⁶ Sain Jesus iron, “Aya im,” ye di, idi soso de dile, tenebur kuku den.

⁷ Jesus baban idi to fedin, “Ā ai umirnēgef?”

Idi diron, “Jesus Nasaret tamal.”

⁸ Jesus iron, “Aya ā arokeneim, aya im. Aya anī umirnagauf are, tamo eneidi utornēdig len, dile.”

⁹ Agef iron are, od Jesus wogō yen anī kisi falauf nigin, “Aya õ wanān anidi takā to folō afelen.”*

¹⁰ Age dife di, Simon Pita ī, dimig adon anī ul feis yale, pris neid mudur nē ferfer weder biya melem salōf iran. Ferfer anī yana Malkus.

¹¹ Age fe di, Jesus Pita irokenen, “Ogon dimig yogon modoū bun kel uno! Dei aya naan kap ifanan anī, aya to āf de?”

Jesus Anas Garan Dirou Dilen

¹² Age ye di, kusī tamo, nedī mudur, Juda neid tempel lo fiya tamo geid, Jesus dalen. Idi ī difo ken,

¹³ Anas garan ket dirou dilen, Anas ī, Kaiafas ne ten, yar anī bun Kaiafas ī pris neid mudur ibodon.

* **18:9:** Jon 6:39

¹⁴ Kaiafas im, Juda tamo kayau wedereid irou fen, tamo tekeleim tamo kayau ganan nigin laa fouf, are deuf, yen.

Pita Jesus Nigin Wa Fen

(*Matyu 26:69, 70; Mak 14:66-68; Luk 22:55-57*)

¹⁵ Simon Pita, Jesus nē dō fiya tar taka ado, Jesus dō difen. Pris neid mudur, dō fiya tar taka anī keleī, anī nigin, ī Jesus ado, pris neid mudur nē fofo malan kau namen dilen.

¹⁶ Anī ere, Pita ī serē bobogen ifaren. In dō fiya taka ī pris neid mudur ī nigin keleī, ī baban serē ke len, bobog lo fiya kayau iroken ken, Pita yale irou, namen dilen.

¹⁷ Kabī kayau bobog lo fedig ī, Pita to fiyen, “Og be, in dō fiya tamo taka anī sā de?”

Pita iron, “Aya sā.”

¹⁸ Menig nigin, ferfer, tempel lo fiya tamo geid, yā kū de fen, salili de, bouweid diroron. Pita īg weim difar fen, bouwa iroron.

Pris Neid Mudur Jesus To Fiyen

(*Matyu 26:59-66; Mak 14:55-64; Luk 22:66-71*)

¹⁹ Fō namen, pris neid mudur, Jesus ī, in dō fiya tar nigin ado, yagon od tai fedin nigin to fiyen.

²⁰ Jesus solof iron, “Aya tamo kayau atun, mala yaor wogō aun. Aya sain faimud Juda neid uub fō bun be, tempel bun, Juda tamo kayau ganan guru de mog, wogō audig. Aya iminēyān taka to wogō aun.

²¹ Ere nigin anī aya to wiyaf? Idi aya wogō au di, karī difiyan onou idi to wiyeid. Ereb aya wogō aun, idi keleī.”

²² Jesus age ye irō di, tempel lo fiya tamo taka non ifaren anim, Jesus wala fāf fen, iron, “Pris neid mudur anī, õ ago urokenēdig de?”

²³ Jesus soloif irokenen, “Aya ereb kū fenēya arom are, õ ereb kū fenēya anī urōf. Anī ere, aya momoi arom are, ere nigin õ walau fā wol?”

²⁴ Age ye di, Anas Jesus difon ado, pris neid mudur Kaiafas gein sur fen.

Pita Jesus Nigin Baban Wa Fen

(Matyu 26:71-75; Mak 14:69-72; Luk 22:58-62)

²⁵ Simon Pita bouwa irorouk ifar mog, idi ī to difiyen, “Óg be, in dō fiya tamo taka anī sā de?”

Í waf fen, iron, “Aya sā.”

²⁶ Pris mudur nē ferfer taka, í Pitam weder salōf iran nē sirag anim iron, “Aya õ ī urom kabier to ailiyeim de?”

²⁷ Pita baban waf mog, kaisā bagai tataro kokorok yen.

Jesus Pailat Mala Bun Ifaren

(Matyu 27:1, 2, 11-31; Mak 15:1-20; Luk 23:1-25)

²⁸ Age fe di, Juda tamo, Jesus Kaiafas bun tamal dale dirou, Rom gawaman mudur nē fō bun dilen. Are bonimei bagai, Juda tamo idi Pasa nē saaf dāf nigin, kal sese de fen, gawaman mudur nē fō namen to dilen.

²⁹ Anī nigin, Pailat idi gedin ulō yeis isi fen, to fedin, “Ere od ã tamo enei bou bun unogouf?”

³⁰ Idi solo de diron, “Í lo wal fiya tamo sam are, amā õ gein to marou masim.”

³¹ Pailat idi irokenēdin, “Ã aug ī waleg fen, āgenei lo bun es wiyēg.”

Juda tamo idi Pailat dirokenen, “Amam tamo yukesiya nigin Rom gawaman to yo faman.”

³² Are Jesus ī naig be fe, laa fouf nigin wogō yen anī, kisi falauf nigin agef wō yen.

³³ Age de di, Pailat aaben kel ile, Jesus iweigne ken, to fiyen, “Õ Juda neid king de?”

³⁴ Jesus solof iron, “Õ ogon kisim od enei urok de, tunim be aya nigin õ dirokonom?”

³⁵ Pailat solof iron, “Aya Juda tamo de? Õ ogon tamo kayaum pris odudug geid, aya bun dirousiyom. Õ ere tako tau agon?”

³⁶ Jesus iron, “Aya neu tano teneub enei nē sā. Aya neu tano teneub enei nem are, neu kabī tamo, Juda tamom aya to daleyauf nigin kusī dem. Anī ere, neu tano teneub enei nē sā.”

³⁷ Age ye di, Pailat Jesus irokenen, “Age fouf, õ king de?”

Jesus solof iron, “Õ ogo yer urok, aya king. Enei nigin aya wō aun, are momoi anī wogō auf nigin, anī nigin, aya tenebur asin. Momoi nē ganan, aya karī difiyadig.”

³⁸ Pailat to fen, “Ere anī momoi?” Age yel fen, ī baban Juda tamo gedin serē ile, idi irokenēdin, “Aya ī bun mosor tako to ailef.

³⁹ Anī ere, āgenei tobonuneī eig fiya, Pasa naa bun, kalabus tamo tako aliskeneīdig. Ã Juda neid king aliskeneīf anī oroyeik de?”

⁴⁰ Idi baban diweig, solo de diron, “Sā, ī sā! Barabas anī wanamāf!” Barabas ī anī bē tamal.

19

Pailat Jesus Aa Tetek Bun Dūf Nigin Iron

¹ Age de di, Pailat Jesus yale fen, irō di, wagī difiyen.

² Kusī tamo malū duri ado dale, teter tanak kori de fen, ī mudur bun kurū difiyen. Idi gabar kadaū dale difounne ken,

³ idi baba baban ī wagen dile fen, diron, “O Juda neid king gai gai ibodōf!” Age de fen, wala fā difen.

⁴ Pailat baban serē kel isi fen, Juda tamo irokenēdin, “Ulegef, aya ī bun mosor takā to ailef anī, ā keleī youf nigin, ī ā gein arou asif.”

⁵ Sain Jesus malū duri kurū difiyen, gabar kadaū difounnen ado, serē isi di, Pailat idi irokenēdin, “Tamo are yeir!”

⁶ Pris odudug, tempel lo fiya tamo geid, ī dile fen, diweig diron, “Aa tetek bun ūf! Aa tetek bun ūf!”

Anī ere, Pailat idi irokenēdin, “Ā aug waleg, aa tetek bun ūg. Aya ī bun mosor takā to ailef.”

⁷ Juda tamo idi solo de diron, “Amā nemā lo ado, lo anī kilei ī laa fouf, ere nigin, ī yogo aya Negur Naal yedig.”

⁸ Od enei Pailat karī ye fen, fatuk bagai kumī yen.

⁹ Ī baban fōaab en kel ile fen, Jesus to fiyen, “Ō nain tamal?” Anī ere, Jesus aiten to yalen.

¹⁰ Pailat Jesus irokenen, “Ō aya od to urokanauf de? Aya ū kafī fiya bun tamal yalelnōya nigin megeir ado, ū aa tetek bun inōya nigineg megeir ado anī, ū keleī sā de?”

¹¹ Jesus solof iron, “Ilun tamal megeir õ to ifonom are, aya ogon megeir farumen to abodom. Anĩ nigin, tamo taka ĩ aya õ imã bun inenan, ĩ yogon mosor odug bagai, ogon wal fiya.”

¹² Jesus Pailat age fiyē di, Pailat Jesus kafī fiya bun tamal yalisnēf nigin, naab imiren, anĩ ere, Juda tamo idi diweig diron, “Õ tamo enei utornē di, ilauf are, õ Sisa* nẽ mou sā. Taka ĩ yogo anĩ king yef, ĩ Sisa kiwai ifenek.”

¹³ Pailat od enei karĩ ye fen, Jesus serẽ yale irou isi fen, es fiya tamo nẽ sia, Meein Bedu dedig modoũ bun ibodon (Meein Bedu are, Hibru od nem yana Gabata).

¹⁴ Naa are Pasa Sifa nigin dodok fiya naa, gaa atun age fiya, naa anĩ ilele di, Pasa naa wõ youf.

Pailat Juda tamo idi irokenēdin, “Ãgenei king yeir.”

¹⁵ Anĩ ere, idi diweig diron, “Uru uraile! Uru uraile! Aa tetek bun ū!”

Pailat to fen, “Aya ãgenei king aa tetek bun aũf de?”

Pris odudug solo de diron, “Amã king taka sā, Sisa dogol.”

¹⁶ Anĩ nigin, Pailat Jesus aa tetek bun dũf nigin, idi imeid bun inon.

Jesus Aa Tetek Bun Dun

(Matyu 27:32-44; Mak 15:21-32; Luk 23:26-43)

Anĩ nigin, kusĩ tamo Jesus dalen.

¹⁷ ĩ yogon aa tetek faali fe, modoũ Mudur Tuwan (Hibru od nem Golgota dedig) iselen.

* **19:12:** Rom neid king odug.

18 An idi Jesus aa tetek bun dun, tamo uru idig, ī geid aa tetek bun didenen, idi urom si sitakā, Jesus atun.

19 Pailat irō di, eig de ditot fen, aa tetek bun degē difen: JESUS NASARET TAMAL, JUDA NEID KING.

20 Juda tamo kayau musei itotoya enei diwesen, ere nigin, Jesus aa tetek bun dun modoū are taun non. Itotoya are Hibru od nem, Rom od nem, Grik od nem.

21 Juda neid pris odudug Pailat dirokenen, “To ‘Juda neid King’ wo utot, anī ere, tamo enei yogo aya Juda neid king yen, ago utot.”

22 Pailat aitedin yale iron, “Ereb aya atoton, are de agef ibodōf.”

23 Sain kusī tamo Jesus aa tetek bun du ken, Jesus nē kolos gei difeid, aiwa adodo foi difen, are teke tekelei kusī tamo mugu mugum gei difen, kolos meluk ilon tamal dogol foi fiya sā. Kolos are meluk tekelei tokō feleya diwan.

24 Idi abob dirokenen, “Ada anī to serek tafouf, ada aisaī tara ken, aibem yalouf anī tailauf.”

Negur nē Itotoya eig ye irok anī kisi falauf nigin, agef wō yen,

“Neu kolos idi atun foi difeid fen,

neu kolos meluk nigin aisaī diran.”[†]

Anī nigin, kusī tamo idi enei age difen.

25 Jesus nē aa tetek sirin, Jesus sina, sina nē tura, Maria Kolopas aiwa, Maria Magdala tamal an difaren.

26 Sain Jesus mala irā, sina ado in dō fiya tamo taka ī nigin wau laa fedig non difar mog, ileid fen, Jesus ī sina irokenen, “Kayau, õ naal yeir.”

[†] **19:24:** Sam 22:18

27 Age ye fen, Jesus yogon dō fiya tamo iroke-nen, “Enei ogon sinā.” Naa anī bunem ilen, dō fiya tamo enei sinawau yale, yogon fō bun iroule, kulatun fiyen.

Jesus Laa Fen

(*Matyu 27:45-56; Mak 15:33-41; Luk 23:44-49*)

28 Anī dumen, Jesus keleī, ereb ereb ganan mogo gama bure felel, Negur nē Itotoya bun ibodok anī kisi falauf nigin, Jesus iron, “Aya naan ail fiyaf.”

29 Wain makik yag ado an ibodon, idi spons dale, wain bun nu dife, aa hisop were bun dino fen, dales, Jesus sigoron dinon.

30 Jesus wain makik anī yale fen, iron, “Gama bure.” Age yel fen, guyu kureis, yogon uur itoron.

31 Gama naa are dodok fiya nē, we fele di, are Sabat naa, Sabat anī are, uub odug. Juda tamo idi, Sabat naa bun, bouweid aa tetek bun ifareya ditorōdig, anī nigin, idi yeid weweurn difeid, bouweid gei difalaisiyouf nigin, Pailat dirokenen.

32 Anī nigin, kusī tamo disin, tamo taka ket ye weweurn difen, takag age difen, idi Jesus geid, aa tetek bun didenen anidi.

33 Anī ere, idi Jesus wagen disi fen, ī mogo laa fen anī dilen, anī nigin, idi ī ye to weweurn difen.

34 Anī fotokar, kusī tamo takam, ot nem Jesus siri gilī fe di, naud naan ado fi felen.

35 Tamō enei ilen im wogō yen, yogon wogōya are momoi, ī keleī, ī momoi wogō yef, are āg momoi gouf nigin wogō yef.

36 Negur nē Itotoya enei kisi falauf nigin agef wō yen, “Yogon tuwa taka to were fouf,”‡

37 agef fen, Negur nē Itotoya takag irok, “Idi siri gilī difen tamo ī, idim dilouf.”§

Jesus Mū Difen

(*Matyu 27:57-61; Mak 15:42-47; Luk 23:50-56*)

38 Anī dum, Josef Arimatea tamal, Jesus bouwa buru yalouf nigin Pailat irokenen. Josef ī, Jesus nē dō fiya tamo taka, anī ere, ī Juda tamo nigin kumī ye fen, iminēyān Jesus dō fen. Pailat yo ye di, ī isi, Jesus bouwa yalen.

39 Josef ī Nikodemus ado fen, disin, kulu tamo anim, bō Jesus gein ilen. Nikodemus ī, marasin yana mer (myrrh) aloi (aloe) ado falei difen anī iroulen, anī nē morō teti kilogram age fiya.

40 Idi urom Jesus bouwa dale, marasin ado gabar lalau nem filu difen. Juda neid tamo mū fiya toboununā bunem age difen.

41 Jesus aa tetek bun dun nē modoū an, kabī taka ado, kabier an, ku mata taka ado, taka an to goro difen.

42 Naa are Juda neid dodok fiya nē naa nigin ado, tokō kug melsā nigin, idi Jesus an goro difen.

20

Matmat Gorō Ibodon

(*Matyu 28:1-8; Mak 16:1-8; Luk 24:1-12*)

1 Uub nē naa matu Sande bun, bonimei bagai gugum ado, Maria Magdala tamal matmat bun ile fen, mala irā, bobog bun meein yaleleya ilen.

‡ **19:36:** Eksodas 12:46; Namba 9:12; Sam 34:20 § **19:37:** Sekaraia 12:10

² Anī kayau, Simon Pita, dō fiya taka Jesus
ĩ nigin wau laa fedig anidi gedin gudu ref ile,
irokenēdin, “Idi Odug matmat bun tamal dale
diroulen, ĩ nain be dinon, ada keleī sā!”

³ Anī nigin, Pita, dō fiya tamo taka ado, matmat
bun dilen.

⁴ Urom gududu den, anī ere, dō fiya tamo takam
Pita wal fe, ĩ ket matmat bun wō yen.

⁵ Ĩ iti ken, fai yen, gabar lalau filu difen anī an
yen mog, ilen, anī ere, ĩ kuren to ilen.

⁶ Age fe di, Simon Pita dum dō fiyen, wō ye fen,
tokō fel, matmat kuren ile, gabar lalau filu difen
an yen mog, ilen,

⁷ mū difen gabar Jesus mudur sile difen anīg
ilen. Mudur sile difen gabar are, yogo fire kori
fel, gabar lalau filu difen anī firen ibodon.

⁸ Age fe di, dō fiya tamo taka, ĩ ket matmat bun
wō yen īg, kuren ilen. Ĩ ile fen, momoi yen.

⁹ (Jesus laa bun tamal kel fā youf ya, Negur nē
Itotoya bun yenek anī, idi fau wedereid fokōya
sā.)

Jesus Maria Magdala Tamal Bun Wō Yen (Matyu 28:9, 10; Mak 16:9-11)

¹⁰ Age de fen, dō fiya tar, nedī fō bun ke de dilen.

¹¹ Anī ere, Maria matmat serē inā yalef ifaren.
Ĩ inā ado inā ado iti ken, matmat namen fai yen.

¹² Agef fen, ĩ, engel uru kolos lalau adodo,
Jesus yenen modoū bun dibod mog, iledin, taka
muduren, taka yen.

¹³ Idi ĩ to difiyen, “Kayau, ō ere nigin inā
walef?”

Maria iron, “Idi neu Odug dale diroulen, ī nain be dinon anī, aya keleī sā.”

¹⁴ Age ye fen, ī falei yel, Jesus an ifar mog ilen, anī ere, are Jesusem ya anī to kelein.

¹⁵ Jesus iron, “Kayau, õ ere nigin inā walef? Ó ai anī umirnek?”

Maria kisi fen, ī kabī lo fedig anim ye fen, irokenen, “Tamo biya, onom ī wale uroulen ouf are, nain be unon anī, aya urokana di, aya ī alouf.”

¹⁶ Jesus ī irokenen, “Maria.”

Maria ī falei yel, Jesus wage ifen ken, Hibru od nem irokenen, “Raboni!” (anī nē gariya, Tise).

¹⁷ Jesus iron, “Aya to urouna, ere nigin, aya Dei gein fau kel iseleya sā. Anī ere, neu turau tar gedin ule urokeneid, ‘Aya neu Dei, āgenei Temei, neu Negur, āgenei Negur bun kelau eselauf.’ ”

¹⁸ Anī nigin, Maria Magdala tamal, in dō fiya tar gedin ile irokenēdin, “Aya Odug ailel!” Age ye fen, Maria Jesus od enei irokenen anī, idi wogō fiyēdin.

*Jesus In Dō Fiya Tar Meleid Bun Wō Yen
(Matyu 28:16-20; Mak 16:14-18; Luk 24:36-49)*

¹⁹ Uub nē naa matu Sande aragau anī bun, Jesus nē dō fiya tar, Juda tamo nigin kumī de fen, sukar kotū difel,aaben guru de dibod mog, Jesus isi, idi atun ifar fen, iron, “Wau inosiya ā ado ibodōf!”

²⁰ Od enī irokel fen, ī ima siri ado idi ifelnēdin. In dō fiya tar idi, Odug dile fen, fatuk bagai kulī den.

²¹ Jesus baban iron, “Wau inosiya ā ado ibodōf! Dei aya sur fiyan gen, ayag ā sur ayeik.”

²² Age ye fen, idi bun fuu fiyeñd fen, iron, “Awa Uur Fateul waleg.

²³ Ñ, tamo neid mosor nigin, wedereñ tu kalauf are, idi neid mosor nigin weder tu kelef, ñ idi neid mosor nigin, wedereñ to tu kalauf are, idi neid mosor nigin weder to tu kelef.”

Jesus Tomas Mala Bun Wõ Yen

²⁴ Anñ ere, Jesus in dõ fiya tar meleid bun wõ yen sain, tuwelf idi neid taka Tomas (yana taka Didimus), idi geid to ibodon.

²⁵ Anñ nigin, dõ fiya tar tunim ī dirokenen, “Amã Odug mailen!”

Anñ ere, ī idi irokenëdin, “Aya yagon ima bun tuni ba to ailauf, aya imau gege tuni ba bun to ano fen, aya imau siri bun to anouf, aya to momoi auf.”

²⁶ Uub tekelei ilele di, in dõ fiya tar baban fõ bun dibodon, are Tomas geid. Sukar kotû difedin, anñ ere, Jesus isi, idi atun ifar fen, iron, “Wau inosiya ñ ado ibodõf!”

²⁷ Agef fen, Jesus Tomas irokenen, “Ogon imã gege ein uno, neu imau uleid. Imã urã siru bun uno. Waũ to ilef isif fouf, momoi dogol wo.”

²⁸ Tomas Jesus irokenen, “Neu Odug, neu Negur!”

²⁹ Age ye di, Jesus Tomas irokenen, “Ó malam aya uleyaf nigin, momoi wof. Idi meledim to dile fen, momoi def, are el fedif.”

³⁰ Jesus, in dõ fiya tar meleid bun, memelik musei inodin, are buk enei bun itotoya san.

³¹ Anī ere, Jesus ī Kristus, Negur Naal anī ā momoi ge fen, ī yana nigin momoya bunem, ā mata walogouf nigin enei itoton.

21

Jesus Gau Yaleya Bun Memelik Inon

¹ Anī dum, Jesus baban in dō fiya tar gedin, Taiberias daliyoun* wō yen. Anī eig fe wō yen.

² Simon Pita, Tomas (yana taka Didimus), Nataniel Kana tamal Galili teneub bun, Sebedi gere tar ado, dō fiya tar uru anidim guru de dibodon.

³ Simon Pita idi irokenēdin, “Aya gau nigin ayō fenē.” Idi diron, “Amāg ō geid talauf.” Anī idi dile, waag bun sosō den, anī ere, bō anī bun, gau taka to dalen.

⁴ Bonimei bagai, Jesus maaī yerin ifaren, anī ere, dō fiya tar idi, Jesusem ya anī to kelein.

⁵ Ī idi iweig irokenēdin, “Mou tar, ā gau taka tau walegel?”

Idi aiten dalen, “Sā.”

⁶ Ī irokenēdin, “Waag siri biya melem kakāg urāg fen, tunī gei gouf.” Idi age difen sain, idi kakāg dī fiya kisi feleya san, ere nigin, gau musei biya.

⁷ Anī in dō fiya tamo Jesus ī nigin wau laa fedig ī, Pita irokenen, “Are Odugem!” ī, “Are Odugem,” ye di, Simon Pita karī ye fen, ī kolos teten tamal inū inon anī yale, luwa guf fen, naanū ifū iran.

* **21:1:** Yana taka are Galili Daliyou.

⁸ In dō fiya tar tunī ganan, waag bun disi, kakāg gau isokosen ado dī de dilen, ere nigin, are idi daliyou yeri gerō sā, handred mita age fiya.

⁹ Sain idi kutū desin, yā kaureya anī bun, gau yā bē bret tunī ado dilen.

¹⁰ Jesus idi irokenēdin, “Ā gau gama bagai walegel tunī urousig.”

¹¹ Simon Pita waag sō ye fen, kakāg dī falaisi, maaī yerin irousin. Kakāg are gau odudug isokosen, gau are 153, gai musei biya, anī ere, kakāg to kokour fen.

¹² Jesus idi irokenēdin, “Usig, saaf wōg.” In dō fiya tar kukī de fen, takam ī to, to fiyen, “Ō aim?” Idi keleī, are Odug yogo.

¹³ Jesus isi, bret yale fen, idi ifenēdin, gaug de age fen.

¹⁴ Jesus laa bun tamal kel fā ye fen, in dō fiya tar meleid bun wō yen are, gama eneim towo fen.

Jesus Pita Baban Wau Yalen

¹⁵ Sain idi saaf dakas fen, Jesus Simon Pita irokenen, “Simon Jon naal, ō aya nigin fatuk waū laa gef, tunī eneidi neid wal fiya de?”

Pita iron, “Odug, momoi, ō keleī, aya ō nigin wau laa gef.”

Jesus iron, “Neu sipsip momou ufoutneīd.”

¹⁶ Baban Jesus iron, “Simon Jon naal, ō aya nigin waū laa gef de?”

Pita soloф iron, “Odug, momoi, ō keleī, aya ō nigin wau laa gef.”

Jesus iron, “Neu sipsip kulatun wiyēdiyouf.”

¹⁷ Jesus Pita iroken towo fe fen, iron, “Simon Jon naal, ō aya nigin waū laa gef de?”

Pita wau moron, ere nigin, Jesus ī to fiyē towo fen, “Õ aya nigin waũ laa gef de?” Pita iron, “Odug, ereb ereb ganan õ keleĩ, õ keleĩ, aya õ nigin wau laa gef.”

Jesus iron, “Neu sipsip ufoutneĩd.

¹⁸ Aya õ momoi bagai arokonok, sain õ gaun, õ naki rel, ogon oroya dō fen uledig, anĩ ere, sain õ tubau bun, imā walese di, taka nem ifōyo ken, õ to oroyok nē an irouleyõf.”

¹⁹ Pita naig be fe, laaf fen, Negur fula fiya medeĩya ifenẽf anĩ nigin, Jesus od enei iron. Age ye fen, Jesus Pita irokenen, “Aya dō wiya!”

²⁰ Pita falei yel fen, dō fiya taka Jesus ī nigin wau laa fedig anĩ, dō feid mog, ilen. (Tamo enei bō saaf yōya bun, Jesus akoron mudur isen ken, iron, “Odug, aim anĩ õ kiwai ifonõf?”)

²¹ Sain Pita tamo anĩ ile fen, Jesus to fiyen, “Odug, tamo enei ī naig fouf?”

²² Jesus solof irokenen, “Tamo enei mata ibod mog, aya kelauf anĩ aya orouf aufeg, õ nigin ere yok? Õ de aya dō wiyauf.”

²³ Enei nigin, dō fiya tar idi atun, od enei iyokelen, are dō fiya tamo enei to laa fouf den. Anĩ ere, Jesus, tamo anĩ to laa fouf ya nigin to iron, Jesus ī eig ye iron, “Tamo enei mata ibod mog, aya kelauf anĩ aya orouf aufeg, õ nigin ere yok?”

²⁴ In dō fiya tamo enei, anĩ ganan wogō ye fen, itoton. Amā keleĩ, in od are momoi.

²⁵ Jesus ī ereb ereb museig age fen. Aya kisi afef, anĩ ganan buk bun ditotlem are, teneub ganan bun modoũ sam.

**Mata Ifenēya Nē Od
The New Testament in the Marik Language of Papua
New Guinea
Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Mar 2025 from source files
dated 31 Aug 2023

d7099f9d-3bdf-5620-8eb3-7e6c51cab7ea